

DITUKU EDI

MUFUNDU EWU WULU



Shààlaayikù anu biimànyine kuulu, bu nwènù mwa kuswa, patùdi twinyika mitu bwa mwaku wà disambila apa.

² Taatù wa mu Dyulu munanga, tudi ne kwanyisha dilòòlò edi bwa eci, mpungà mukwabo bwa kulwakù kutwàla Evanjeeliyo ewu wa butumbi, wa ùkèmeshangana wa Yesu Kilisto. Tudi tuKwela twasàkidila bwalu Yèyè ùcìdi mushààle anu umwèumwè awu makeelela, leelu, too ne kashidi. Tudi tuKwela twasàkidila bwa bantu aba bàdi badìsangishe kaaba aka mu cikondo cya mashika eci, ne bacìkàle anu ne dizùkà dyabo dinene, bindìle, biitàbùùje ne cintu kampàndà cya cya pabwàcì necitùpèèshùbwè kùdi Nzambi. Tudi tulwa ne ditèkemena adi, Mukalenge, ku disangisha ne disangisha dyònsò. Tudi tuKwela twasàkidila bwa masangisha, a dilòòlò dya dyàbwàbwà, ku tabernacle; tuKwela twasàkidila bwa disangisha dya makeelela dilòòlò kaaba aka, ne bwa disangisha dya leelu, ku tabernacle. Tudi bindìle mpindyewu ciWikalà naaci bwetu twètù dilòòlò edi.

³ Taatù, tudi bamanyè ne muntu yònsò udi ne bukole bwa kunyungisha byanza ewu mmufwànyine kubuulula mabeji a Bible, kadi kùdi anu Umwepele Udi mwa kuMuvwija ne mwoyi ne kwikalayè wa cya bushuwa, mwine awu ng'Wèwè. Nenku, Taatù, tudi bindìle bwa Wèwè kwenza nanku dilòòlò edi. Tùbènèshèku mu mushindu wònsò. Myoyi yetu mmyùle tètè ne disanka pàtùdi tumòna dîbà dyènda dîseemena ditwàtwilanganà Nendè, mpàla ne mpàla, Yèyè utùdi banangè ne utùdi bashààdile ne mwoyi bidimu byònsò ebi awu.

⁴ Bapyabàpyà bààbùngì, Mukalenge, mbakùdimùne micìma. Ndi ngumvwa ne mùsùmbà munene, makumi anaayi anyì makumi ataanu, bikèngela kubàbàtiiza mu Dîna Dyebe, mu dinda, bàà ku disangisha dya makeelela dilòòlò. Éyì Nzambi, swàku ùtungunukè, tudi tulòmba, too ne pìikalà Dimiinu didyànjlila kulongolola dyònsò dya Nzambi dimòne Bukènkè bwa Evanjeeliyo, ne dibwelè mu cikùmbi.

⁵ Tudi tuKulòmba bwa ùtùsokòkèku paanyima pàà Dìyì; ùtùfòfòmìjèku ku bintu bya pa buloba, ne ùtùlekèlèku tùmone Yesu. Swàku bwa kwikalè dilabula dya pa Mukùnà wà Dikùdimuka dya mpàla munkaci mwetu, dilòòlò edi, bwa katùmònu mukwabo muntu to anu Yesu. Tudi tulòmba nunku mu Dîna Dyèndè, ne bwa butumbi Bwèndè ne dishìndika dya Evanjeeliyo Wèndè. Amen.

Nudi mwa kusòmbaayi.

⁶ Nèngiikalè anu mwa kukùdimuna cikòlokolo eci, anyi cyambilu eci, ncisendeka anu ndambu, piikalàbi bikùmbàne nanku, bwa mpetè mwa kumòna nseke yònsò yibidi ya batèeleji. Ngeela meeji ne ndi mwa kulòmba bwa bàteekèku bikòlokolo bìdì mu nyungulukilu ebi mu mushindu mwîmpè. Eyo, indilà kakese.

⁷ Tudi twela myoyi, kuumukila mu dibàlaasà dinene edi dilòòlò edi, balunda beetu bàdì mu Arizona, Californie, Texas, ne mu États-Unis mujimà, mu mushindu wà telefone. Eci—eci cidi cìya mu ditunga dijimà, disangisha edi dilòòlò edi, mu mushindu wà ku maatelefone, pa nanku tudi batwishiibwe ne Nzambi neàtùbènèshè.

⁸ Nudikù mwa kuumvwa anyi, paanyima pààpa too ne—ne ku dibàlaasà ku dyàbakajì kwàka? Eyo, nebìikalè mwa kukenketa mpindyewu ndongolwelu wà ku maatelefone, bwa kumòna ní ùdi wènda bìmpè.

⁹ Bantu bònsò bàdì ne disanka dilòòlò edi anyi? [Disangisha didi dyàmba ne: “Amen.”—Muf.] Twámbe ne, abi mbilenga! Elu luseke pààlu? [“Amen.”] Amen. Ndi ne disanka be pa kumòna ne nudi bònsò basòmbè bacyankàme.

¹⁰ Nenu mpindyewu mààlabà dilòòlò, misùmbà ya bantu yòyi mitùngùnùke anu ne kuvulangana, nebàngacile pààbo buludi ku maatelefone. Bàdikù dilòòlò edi. Ngeela meeji ne bamwe bàà kùdìbo bàdì ku tabernacle kwàka.

¹¹ Nenu, mààlabà mu dinda, masangisha kaèna mwa kwenzeka mu tabernacle to, bwalu...nekwikalè mulengeji wa ne bilòngò kuntwaku ùlengeja ekeleeziya bwa dibàkà mààlabà mu mapingaja. Nenu mbatentèmùne ma—masangisha, mu dinda, baàtùme ku ekeleeziya wa Mwaneetu Ruddell, umwe wa ku bakwàcishi beetu, ne mu—mu cibeeba emu, 62. Mbacifidile dimanyisha anyi? [Mwaneetu Neville ùdi wàmba ne: “Eyowa.”—Muf.] Mbacifidile dimanyisha. Nenu, citanda cyòci cyùle ne pambelu kuntwaku, netwàngatè bakwabo abu tùtumè mwambi mukwabo mwa Mwaneetu Junior Jackson, mwàmwa mu Clarksville. Cidi cyenze ne tùkaàtèèkèlè mwa Mwaneetu Ruddell, bwalu mpabwipi apa, nenu tudi mwa...nenu tudi beelè meeji ne nudikù bafwànyine kupeta awu mwaba bipeepèle menemene. Ne pashiishe netùtangilè bwalu abu mu mushindu kampanda. Nenu nwikalàayi batwishiibwe bwa kwenza mabàtiiza ónsò awu bwa mààlabà, ne ndi ntèkemena ne nekwikalè bakwabo lukama anyi nkama yibidi basàkidila ku bòbò abu bwa dibàtiiza mààlabà. Nenu mpindyewu mààlabà dilòòlò. . .

¹² Mèmè ncitukù munange kudyànjlila kumanyisha cintu cyùdì wakulapù to, kadi dilòòlò kampànda mu disangisha, anyi dituku kampànda, ndi muswe kwakula pa cyena-bwalu cya ne:

Melekisedekè Ewu Nganyì? Bwalu ncyena—ncyena—bwalu cîndi mêmè ngeela meeji ne tudi ne mwoyi mu cikondo cidi mabuulula aa, àkaadi meelega lukonko mu cikondo cijimà eci, lwà ne: “Muntu Mwine ewu Nganyì?” Ne ndi ngeela meeji ne Nzambi ùdi ne dyandamuna dya ne, Yèyè awu ùvwa Nganyì. Bamwe bàtu bambè ne, “mbwakwidi kampànda,” bamwe ne, “mfumu kampànda,” bamwe. . . Kadi kùdi ne cya kwikala. . .

¹³ Pàdiku anu lukonko, kùdi ne cya kwikala dyandamuna ku lukonko alu, didi dijaalàme. Kakwèna mwa kwikala lukonko kakùyi kwanji kwikala dyandamuna nansha.

¹⁴ Mpindyewu, tudi batwishùbwe ne Nzambi neàtùpèèshè dibènesha dilòòlò edi mu Dîyi Dyèndè, patùdi tuDìbala.

¹⁵ Ne nwènù nudi bapetè. . . Billy mmungambile bwa nnwàmbilè ne nudi bapetè cya bushuwa dikwàcishangana mu mudimu ne bantu kaaba aka bàdi mu ndongolwelu wa myaba ya diimanyikila màshinyì, bampulushi ne bakwabo bônso. Tùngunukàayi naaci; abi mbímpe, bimpè be.

¹⁶ Tudi batèkèmène ne netùmonè cikondo, pàmwápa mu matuku acìvwavwà àdi pabwípì apa aa, pàmwápa atùdiku bafwànyìne kulwa ne nntentà kaaba aka mu cimenga emu ne kumwasa pambelu apa mu cipalu cya ndundu emu, mutùdiku bafwànyìne kushààla mukùngùlù mule, pàmwápa mbingu yisatu anyì yinaayi, ditàbuluja, dya kacya dyàngatangana. Kadi apa tudi anu tumanyangana muntu ne mukwèndè, ne pashìishe bikèngela tùlayanganè tuye cyakabidi. Kadi mêmè ndi muswe kulwa kushààla mu lwendu lwà matuku àbùngì, cikondo kampànda cya bafwànyìnekù kushààla mu mushindu wà kabiyi bikèngela bwa twètù kukànga dilòòlò dimwepele anyì abidi to, kadi kushààla anu nakà ne kulongesha, mundaamuunya ne bufuku, mundaamuunya ne bufuku, bitùngùnùke anu nanku. Pàmwápa muntu wànji kwalukila kumbelu ùkapèèsha nzoolo byàkudyà, ùkàma ngombe mabèèle, kadi kwalukila lumingu lùdi lùlondà ne kutùngunuka ne masangisha. Mêmè—mêmè ntu muswe bya nanku. Pa nanku Mukalenge ikalèku neenu.

¹⁷ Mpindyewu, kumpala kwa mêmè kuumuka, pàmwápa mu dyalumingu mu dinda anyì mu dyalumingu dilòòlò, anyì dîbà kampànda, dimwe dya ku masangisha aa, ndi mumanye ne nudi bônso bindile bwa kutèèleja Diyiisha pa Bulelèlè bwa *Dibàkà Ne Difwà Dyà Dibàkà*, didi cimwe cya ku bilumbù binène bya mu dituku edi. Ne mêmè ndi mutwishùbwe anu mùndi mwimane kaaba aka emu, ndi ngiitabuuja ne dyandamuna dijaalàme didi mu Dîyi dya Nzambi, ne ndi mwitàbùùje ne cyòci aci ki cìmvwà mulayìle bwa kwalukila.

¹⁸ Ne ndi ncinka, mwikàle mumanye, ku dyànyì pàànyì dimanya ne, ndi muswe kwenza dikwabo disangisha muneemu mu Jeffersonville, mu dyalumingu dya Paasàkà, ne netwikalè. . . bwa disangisha dya dipàtuka dya dîbà, ne pashìishe mu

dyalumingu dya Paasàkà. Pa nanku ne tùmimanyishe kumpala ne kuteeta pàmwápa bwa kupeta dibàlaasà, kwòkò mushindu, anyi mwaba kampànda, bwa mu dyalumingu, pàmwápa kulwa mu diisambombo ne mu dyalumingu. Nebikengelè bwa mèmè kwangata ndekè kulwa ne kwalukila, bwalu cidi pabwìpi ne díbà . . . Bikèngela ngànji kucikenketa, dyambedi, ne ndongamu ùndi nendè, ne umwe wa ku njila wànyì—wànyì—wànyì mu Californie. Ne pashìishe, dyàkàmwè paanyima pàà cyôci aci, bìdi bikèngela nye ku—ku Afrike. Pa nanku twikalàayi anu tubiikilangana ne nwatùsambidilaayi.

¹⁹ Mpindyewu, dilòlò edì, ndi muswe kukòka ntèmà yenu ku citùpà cya Dìyì dya Nzambi, cìdì cìsanganyibwà mu nshapita mwi4 wa Luuka Munsantu. Nshapita mwi4 ku mvensa wa 16, kubangilapù, Yesu ngudi wakula.

. . . *Dituku edì Dìyì edì dyùlù mu macì enu.*

²⁰ Mpindyewu tudi baswe, kwangacila pa Cyôci aci, dyoya dya mùdì Dìyì dya Nzambi diikàle ne bukolè bwendeshi! Mpindyewu twètù bònsò tudi mwa kudifwànyikijila byamu bilamakaja, kadi bìdi bikèngela Bukole bwendeshi bwa kuCyèndesha.

²¹ Tudi mwa kudifwànyikijila cìdì byamu bilamakaja bya màshinyì, a kadyèndelandelà, kadi díbà adi bìdi bikèngela bukole bwendeshi bwa kufikisha nkàta ku dìkwàta mudimu ne ku dyenda.

²² Mpindyewu, Yesu ùvwa mwalùkile ku—ku Naazàlèeta, kùvwàYe mukolèle. Patùdì tulondesha Mifundu kaaba aka, tudi tusangana ne bàakamba ne: “Tudi bumvwe bàmba ne Udi mwenze *bikampànda ne bikansanga* mu Kaapènùmà. Mpindyewu twànji tùmonebi mÙdì ubyènza Mweni muKulela emu.”

²³ Yesu kwambaYe ne: “Mu—mupròfetà kàtu ne butùmbi mwàbò mumulela to.” Nenku, mu bushuwa bwa bwalu, mwômò amu ki mùdì mukolèle, ne mùdì bantu bakumanyè. Kadi mwômò amu ki mùvwàYe ne—ne—ne lumù lubi’s, twamb’eku twamb’eku, bu mwàkalediibwàYe kàyi ne taatù wa pa buloba ebu. Bàvwa bàMubiikila ne “mmwànà mulèla mu masandi,” bwa ne Mariyà mu bulelèlè wàkiimita difù kumpala kwa kusèdiibwayè, bya bantu bònsò bamanyè, kùdì Yòzefù. Kadi, kabyèna nanku to, twètù tudi bamanyè ne kabyèna nanku to.

²⁴ Nenku pa Mufundu ewu, cìdì cyenzè ne mèsù àànyì àkatwishile pa cyôci eci, ncintu kampànda cìvwà cyenzèke anu abidi àdì panshi aa mu Phoenix, mu Arizona. Divwa ndituku dya ndekeelu, dya disangisha dìmvwà ne cya kwakula ku Mpwilu wa Buloba bujimà bwa Beena kantu-ku-byanza bàà Evanjeeliyo mu kaabujimà.

²⁵ Nenku mu mwine mpwilu ewu mùvwà mwenyi kampànda uvwa mutwèndèle, uvwa mwepiskopo wa beena Katolike, wa—wa beena “Mikiyà ya cyena Kasàda ya ekeleeziya wa Katolie wa

Ciipostòlò; Mutàmbe Kuneemekibwa John S.Stanley, O.S.D.” Yèyè ùtu “mwepiskopo mutàmbidile wa États-Unis wa bimenga binène,” mu ekeleeziya wa Katolike. Kwenzekabì ne *eci* ki karta kèndè ne—ne mwaba wèndè wùdìye musòmbèle.

²⁶ Nénku yèyè ùvwa mwenyi mwendèle Beena kantu-ku-byanza baa Beena Kilisto, ne mèmè mvwa mumumwène mwómò amu, dituku òvwa didyànjlè. Nénku pàmvwà munkacì mwa kwakula mu diisambombo dilòlò amu, ngeela meeji mmùvwàbì, anyì mu diisambombo mu dinda ku didya dya mu dinda, nénku ki mèmè . . . Pàmvwà ngaakula apu, yèyè ùvwa anu kacya wànjooja. Mèmè kudyàmbidila ne: “Ncya bushuwa ne muntu wàwa ùdi ùbèngangana ne byònsò bìndi ngamba ebi.” Nénku, nudi bamanyè’s nuvwa bafwànyine—nuvwa anu bafwànyine kumumòna’s; ùvwa wènza kubàndisha mutu ne kuwùpwekesha bitùngùnùke anu nanku, kadi mèmè ncìvwa anu mumanye menemene cìvwa cikwàta mudimu pa yèyè to.

²⁷ Pa nanku mu dyalumingu mu mappingaja, pàngààjuukù bwa kwakula, mvwa ne cya kwangacila cyena-bwalu cyànyì pa *Bisaamà Byà Pa Kulela*, mùdì Yesu mwambe, ne: “Anu mùdì mukaji mu didinyènga bwa kulela mwànà,” yèyè ùdi ùdinyènga bwa kulela. Nénku mèmè mvwa ne cya kwakwila pòpò apu, bu ne: *Bisaamà Byà Pa Kulela*, cyena-bwalu aci, ngamba ne buloba bùdì mu bìaamà bya pa kulela mpindyewu. Bikèngela bwa bwà kale bùumushiiwbè, bwà bupyabùpyà bùlediibwè; anu mùdì di—dimiinu ne cya kubola, bwa bwàmòna mwa kufila mwoyi mupyamùpyà.

²⁸ Ne mushindu mwine wùvwà bìaamà, bìaamà bya pa kulela bituutè buloba’s wè! Mu Mvita ya Kumpala ya Buloba bujimà, bwàkapeta bìaamà bya njàjàmà, bwalu bàvwa ne mulùngù wà gaz, ne bikwabo, cìvwà cìfwànyine kwamba kubùtula buloba. Ne mu Mvita Miibìdì ya Buloba bujimà, buloba bwàkatuucika kudi bikwabo bìaamà, bitàmbe bukolè; bàvwa ne bòmbè ya bujitu, ne bòmbè bwa mushindà kabidi. Kabwènakù mwa kutwàla bikwabo bìaamà bya pa kulela to. Ne missiles eyi ne bikwabo leelu ewu, mvita mikwabo neyibùkùpè mu cibwàshibwàshì, bwalu nebùlediibwè mpindyewu. Nénku nekwikalè buloba bupyabùpyà. Bible mmwambe ne nebwikalèku.

²⁹ Mu Mukenji wà mupròfetà yònsò, Izaleela wàkapeta bìaamà bya pa kulela, bwalu bapròfetà aba bàvwa bàlwa mu cyalu paanyima pàà beena tèlòlòji ne balombodi bàà ekeleeziya bamanè kufikisha ekeleeziya mujimà mu mmwènekèlu wa bulongolodi. Nénku pàvwà bapròfetà abu bàlwa mu cyalu ne EMU MMÙDÌ MUKALENGE WÀMBA, bàvwa bànyungisha ekeleeziya ayi, ne ùvwa ùpeta bìaamà bya pa kulela. Ndekeelu wa byònsò, kupetabù bìaamà bya pa kulela too ne mwàkalwàye kulela Mwànà wa balume wa Evanjeeliyo, uvwa Dìyì Dyòdì diine divwijiiibwe mubidi.

30 Pa nanku ncyà bushuwa ne ekeleeziya ùdi mu bìsaamà bya pa kulela, cyàkàbìdì, bwa dilediibwa dya Mwànà awu, Mwànà wa Nzambi udi ne cya kulwa cyàkàbìdì. Beena tèòlòjì beetu bônso, ndongolwelu yetu yônso, mangumba etu ônsò, mbibole anu mwinshi mwetu mene emu. Pa nanku twètù tudi mu bìsaamà bya pa kulela, ne Mukenji wà kùdì Nzambi wùtu misangu yônso anu wùkùpa ekeleeziya mu bìsaamà bya bitàmbe kukola, kadi paanyima pàà cikondo yèyè neikalè mwa kulela Mukaji-musela. Aci necitwalè Yesu Kilisto kùdì Mukàj'Èndè-musela.

31 Nenku, dîbà adi, mvwa ndyàm̀bidila ne muntu ewu ùvwa mubènge mwoshè ne munu mwìkù bwa kutwa ku cyànyì. Pàngàajuukù bwa kuyiisha dyòdì Diyiisha edi, mèmè kubuulula mu Bible wanyì, bwa kupeta ñibeji.

32 Kadi mukàjàànyì ùvwa mufùme ku dimpèèsha Bible mupyamùpyà, bwa Noël. Wanyì Bible wa kale ùkaadi ne bidimu bitwè ku dikumi ne bitaanu, ne cilùm̀yànà aci cikaavwa anu cipandikàngàne cishààle tusùnsukilà. Mabeji awu, musangu wônso wùvwàwu àbuululuka, àvwa àpèèpukamù. Nenku, kadi mvwa mumanye anu menemene mwaba wà kupetela Mufùndu wônso, nenku ntu ndonga ne ntèmà yônso mu Bible awu. Nenku mèmè kwambula anu mupyamùpyà awu, bwalu mukwabo awu ùkaavwa ne mmwènkelu wa musùnsuke bikole, bwa kuya nendè mu ekeleeziya.

33 Nenku ndi mwenze anu mbanga kubuulula mu Yone Munsantu, mwaba wùvwà Mufùndu awu wùsanganyiibwa, mèmè kubanga kubala nshaapita wa 16, kadi mvensa ùmvwà nkeba awu kàyimù to. Ki mèmè kudyàm̀bidila ne: “Ebu’s mbwalu bwa dikema!” Mèmè kubuulula cyàkàbìdì; kaciyi ànumù to.

34 Nenku Mwaneetu Jack Moore, wa ku Shreveport, mu Louisiane, mulunda wanyì wa pa mwoyi, ùvwa musòmbe mwaba awu. Mèmè kwamba ne: “Mwaneetu Jack, bwalu abu kabwèna bùsanganyiibwa mu Yone Munsantu 16 anyi?”

Yèyè ne: “Mmùdìbu.”

35 Ki nsaserdose wa Katolike ewu kukàtamukayè mu nkwasà wendè, munkaci mwa balombodi bàà maèkèleeziyà batwè ku lukama basòmbe pa cibumba cya ku cyambilu apu; kulwayè tàmakàtàmàkà too ne pabwìpì naanyì apu, ne mìzàbì yèndè ne nkanzu mileemile ne nkuruse ayi, ne bikwabo, ne kuseemenayè pabwìpì naanyì apu. Ki kwambayè ne: “Mwanàànyì, twà makàsà panshi. Nzambi ùdi wàm̀ba kumata mu cyalu.”

Mèmè kudyàm̀bidila ne: “Mwepiskopo wa Katolike ùngambila aci?”

Yèyè ne: “Cìbadilè mu wànyì Mukanda emu.”

36 Ki mêmè kubadila Mufundu awu mu wèndè Mukanda, ne kwangata cyena-bwalu cyànyì e kutungunuka, kuyiisha diyiisha dyànyì.

37 Pashiishe, pângààjikijì, yèyè kajuuka pânkaavwà mêmè mumane kuya, kwambaye ne: “Kùdi cintu cimwepele cìdì ne cya kwenzeka. Paanyima pàà bamanè kuumvwa citũmvù eci, bikèngela ekeleeziya àpatukè mu cimvundù cidìye ùsanganyibwa, anyì twètù mbàdì ne cya kupàtuka mu cimvundu cìdì ekeleeziya ùsanganyibwa.” Pa nanku, eci anyì eci.

38 Nenu mvwa mu njila ngaalukila kumbelu, ngaalukila mutàngile ku Tucson, dilòlòlò adi. Bânà bàvwa bàdila bàlòmba dyâmpà dyela minyĩnyì, ki mêmè kwimanyika bwa kusumba dyâmpà dyela minyĩnyì ku kaamèesa kakese kàà disũmbishila bintu. Ki mukàjàànyì kwambaye ne: “Bill, kacya bàndela ncitukù mubìndùlùke mushindu wàwa to, pa kukumòna wèwè mwimane mwaba wàwa utwà mu nsampu utwà mu kaleji mu Bible mujimà wàwa.” Yèyè ne: “Kacivwakù cikubìndùlùle wèwè anyì?”

39 Mêmè ne: “Bwàlà.” Mêmè ne: “Mêmè’s mvwa mumanye ne civwa mu mwaba kampana muntwamu. Cìdì anu ne kí mbèèlemu dibeji adi to. Ncilèmà cya ku cyamu.”

40 Ki kwambaye ne: “Pa kwela meeji ne, mêmè ngudi mukupetèle mwine Bible awu! S’bìvwa anu bu ne dísù dyònsò muntwamu dívwa dintàngile anu mêmè.”

41 Ki mêmè kwamba ne: “Ee, kùvwa ne cyúvwa pèèbe mwa kwenza to. Aci’s civwa ncilèmà cya ku cyamu mu Bible.” Mêmè ne: “Bòbò mbàdì kabàyikù beelè dibeji adi mwómò amu to.”

42 Ee, mêmè kutùuluka ne kutàpamù cyàkàbìdì dísù, bìvwa bipwàngàne anu ne mwàbì ne kale; kadi nshapita wa 16 ùdì ùjika, citùpà, citùpà cyèndè ciikàle anu mu ntàntà wa centimètres bu mwandamutekète kuumukila kwinshi, kuulu kwa nshapita wa 17 dya luseke lukwabo, cyenzè cintu cimwecimwe aci. Nenu, bu muvwàbì ne m’Bible mupyamùpyà, mabeji abidi awu àvwa malamàkàne anu menemene, nenu mvwa mbala mu nshapita wa 17 luseka lukwabo alu pamutu pàà wa 16. “Ee,” mêmè ne, “bìdì anu bìmpè. Cìdì mbwa kiipacilà kampànda.”

43 Nenu anu munùdì mwa kuumvwa diyì kanà dyònsò bitòòke tòò emu, Diyì kulwaDì kùndì, dyamba ne: “Yèyè wàkabwela mu Nazàlèeta, mùvwàYe mukolèle amu; ne kubwelaYè mu nsunàngòngà, bu mùvwà cilèlè Cyèndè. Ki mwakwidi kuMupèeshayè Mifundù ya kubala, nenu kubalaYè Yeshàayi 61. Ne pààkamanàYe kubala Mifundù ayi, Wakasomba; kwalujilaYè mwakwidi awu Bible, Mukanda awu, ne kusomba. Ne mèsù ònsò a disangisha dijimà àvwa maMutàngile. Ne Méyì a mushinga mukole àkapàtuka mukana Mwèndè. Ki kwambaYè ne: ‘Dituku edi Mufundù ewu wulù.’”

“Dituku edi Mufundù ewu wùlù.”

⁴⁴ Mushindu mwine wùdì Mifundù ne ndudì's wè! Nwènù bamòne cyòcì eci mu Yeshààyi 61.1 too ne ku 2, ki mwaba wùvwà Mukalenge wetù ùbadila, Yeshààyi 61.1 too ne ku 2. Kadi munkaci mwa mvensa mwi2 wa Yeshààyi 61 amu, Yèyè kwimana. Mwaba wùdibo bambe ne: “Nyuma wa Mukalenge ùdi pambidi pàànyì; bwa kuyiisha cidimu cya ngàsà,” pashìishe kwimanaYè. Bwa cinyì? Cikwabo citùpà aci, bwa kutwala dilumbulwisha, kacivwa citàngila dilwa Dyèndè dya kumpala to, kadi Dilwa Dyèndè diibìdì. Nwamònu's, kacivwa citàngila aku to. Mushindu mwine wùdì Mifundù kayiyiku yitùpakana's wè! Yòyi yidi misangu yònsò anu mipwàngàne. Yesu wàkiimana anu mwaba wùvwà Mufundù mwimane, bwalu ki cìvwà ne cya kushindikibwa anu menemene mu dituku Dyèndè Yèyè, mpindyewu, mu dilwa dya kumpala adi. Ku Dilwa diibìdì Yèyè neàtwale dilumbulwisha pa buloba; kadi kacivwa mmusangu awu to. Bìvwà bikèngela Yèyè “kuyiisha cidimu cya ngàsà.”

⁴⁵ Mònaayi Maasiyà mwimane mu cyambilu, bwa kuDifwanyikija ne Dìyì dya mulayi dya cikondo aci. Mushindu mwine wùdìbì bikèmesha's, Maasiyà mwimane kumpala kwa ekeleeziya! Kadi tàngilàayi Méyì a mushinga mukole awu, pàdìYe wàmba kaaba aka ne: “Bwa kuyiisha cidimu cya ngàsà.”

⁴⁶ “Cidimu cya ngàsà,” mutùdì bònsò bamanyè, twètù bu babadi bàà Bible, cìvwà “ncidimu cya cyanga.” Bìvwà ne, pàvwà bapika anyì beena bùlokò bònsò, mùvwàbo amu, babàkwàte, mu bùlokò; ne bìvwà bikèngela kufilabo mwànà wa balume, bwa kufuta dibanza; anyì mwànà wa bakaji, bwa kufuta dibanza, [Katùpà kàà mukàbà wà méyì munda mutupu—Muf.] ne bòbò bàvwà mu bupika. Ntàntà ukaavwàbo mu bupika nansha mwikàle bule kaayi, anyì ntàntà uvwabi bikèngela bwa kushààlabò mwòmò amu nansha mwikàle bule kaayi; pàvwà cidimu aci cìlwa, cya cyanga aci, pàvwà mpungi ùdila, muntu yònsò ùvwà mwa kuya mudìshikàmìne yèyè muswe kuya mudìshikàmìne. [Katùpà kàà mukàbà wà méyì munda mutupu—Muf] Wèwè udi mudìshikàmìne. Kùcìvwà kabidi mupika nansha.

⁴⁷ Kadi paùvwà ujinga kushààla mupika, dìbà adi bìvwà bikèngela kuyabò neebe ku ntempelu, wimana ku luseke lwa dikunji dya ntempelu, ne bàvwà bàngata mulonda ne bàkutùbula disòsò ku dicì, nenku dìbà adi uvwa ne cya kukwàcila mfumwèbè wa bupika awu mudimu matuku ebe ònsò a mwoyi.

⁴⁸ Cileejilu cipwàngàne kaayi cya Evanjeeliyo wa Yesu Kilisto! PàdìYe ùyiishiibwa, cikondo cya ngàsà, ne cikondo cya Cyanga; muntu kanà yònsò, nansha bàmba ne wèwè udi nganyì, nansha mwikàle wa dikòbà kaayi, nansha mwikàle wa mu dingumba kaayi, nansha wèwè mushààle wa ciipanshi mu mpeekatu bishi,

anyi cidi kaciyi cyenda bimpè kùdi nansha ciikàle cinyi; udi mwa kuya mudishikàmìne paùdi umvwa mpungi awu wa Evanjeeliyo údila. Udi mudishikàmìne!

49 Kadi wèwè mwele Mukenji awu nyima ubènga bwa kuWùtèèleja, ùfundè ùlamè, bàvwa bàkutùbula dicit, ne mulonda. Aci, mbwena kwamba ne, wàmanyi kusambuka mukàlù wà pankaci pàà ngàsà ne dilumbulwisha, ne kwàdyàkutèèlejakù kabidi Evanjeeliyo to. Kwàdyàkuya kabidi kule kupita apu to. Udi ne cya kushààla mupika wa ndongolwelu ùdi usanganyiibwamù awu, matuku ebe ònsò a mwoyi, wèwè mubènge kutèèleja cidimu cya ngàsà aci.

50 Mpindyewu, cikwabo citùpà cya cyòcì aci, anu mûngãmbi amu, kabivwa bikèngela kucyàndamuna to, bwalu Maasiyà ulwàlwa ewu, kumpala eku mpindyewu, mpààtwàlàYe dilumbulwisha.

51 Mpindyewu, mmunyi mùvwàku bantu abu mwa kupanga kumòna ne Yèyè ùvwa Nganyi? Ciine aci cìvwaku mwa kubàpita bìshi? Cìvwa mwa kwenzeka munyi pàvwàci cimanyishiibwe ne cileejìibwe bitòòke tòò mushindu awu? Mmunyi mùvwàbo mwa kwikalakù bapangè kumòna? Bya bwalu Yèyè. . .

52 Dìyi kaayi's wè! Anjì elààyibì meeji ku bwalu abu ne: "Dituku edi Mufundù ewu wùlù mu mèsù mwemu." Wákacyàmba awu nganyi? Nzambi Yèyè mwine, Yèyè udi muDyùmvwijidi wa Dìyi Dyèndè awu. "Dituku edi Mufundù ewu wùlù." Maasiyà, Yèyè mwine, mwimane kumpala kwa disangisha ne ùbala Dìyi kampanda mu Bible, dya diMutàngila Yèyè mwine, ne pashiishe wàmba ne: "Leelu ewu Mufundù ewu wùlù," kadi bóbò anu bapangè kuCimòna.

53 Bwalu bwa dibungama kaayi bùdicit cifwànyine kwikala, kadi pààci's ncyenzèke. Ncyenzèke misangu yàbùngì. Ncìfwànyine kwenzeka bìshi? Mu bushuwa bwa bwalu, mwàkenzèkàbi mu bikondo bikwabo amu, mu kwitabuuja kwa dyumvwija dya bantu dya Dìyi. Ki cyàkacikèba ncyòcì aci. Beena kwitabuuja abu mu matuku awu, beena kwitabuuja bàà ku dìnà abu, bàvwa bàngata dyumvwija dya cìvwa mwakwidi mwambè pa bìdi bitàngilà Mifundù. Ki bwa cinyi Yesu, kàyi wa nansha wumwe wà ku milongo yabo anyi ku tusumbù twabo to, Wàkiiipaciibwa mu cisòmbedi cyabo.

54 Nenu, ki bwa cinyi, kabàvwakù mwa kuMufwànyikija ne bóbò to, bwalu Yèyè ùvwa mushiilàngàne naabo. Mupersona wa Yesu Kilisto ùvwa wa wa pabwèndè mu mushindu wà ne muntu nansha umwe kabìvwakù bìkèngela kupangayè kumòna ne ùvwa m'Mwànà wa Nzambi to, bwalu Yèyè ùvwa dimanyishiibwa dipwàngàne dya Mufundù wùvwà mufùnda bwa bwalu Bwèndè awu.

55 Mushindu awu ki wùdì mwena Kilisto kanà yònsò ùmanyiibwa, pàdì nsòmbelu wendè ùmanyisha bintu mene bidì mwena Kilisto ne cya kwenza.

56 Mushindu mwine wùvwàYe mwa kwimana mwaba awu ne kwàmba ne: “Dituku edi Mufùndù ewu wùlù mèsù enu madimwène!” Mwine mùvwàbi bìkèmesha, mùvwàbi bitòòke tòò, kadi nansha nanku bantu abu bàakumvwa anu bibi. Bwa cinyi? Mbwalu bóbò bàakangata dyumvwija dya kasùmbù kampanda kàà baakwidi bàvwàbo bàtèèleja.

57 Ne maalu-malonda pààwù àtu ènzuluka. Ne Mufùndù wùtu ne dyumvwija pàbidì dyàWù, ne dibuulula pabidi.

58 Cileejilu, bu mùdìbo bàmba mu Bible, ne: “Ndi mubiikile mwan’Àànyì bwa kupàtukayè mu Èjiiipitù,” ciikàle cyàmba bwa Yesu. Tàngilàayi ku mwelelu wa dibeji aku, nenùsanganè, cidi kabidi cyàmba bwa Yakòbò, Mufùndù wumwewumwe awu. Yesu ùvwa Mwan’Ènde mutàmbe bunene. Yakòbò uvwa mwan’Ènde wàkabiikilaYe bwa kupàtuka mu Èjiiipitù, mùdì kantu kàà dileedila kàà Scofield ne twà dileedila tukwabo twònsò tucyùmvwija, bwalu ku Mufùndù awu nkùvwàci cileedila. Pa nanku cìvwa ne—ne dyandamuna pàbidì; cìvwa ne dyandamuna bwa Yakòbò wàkabiikidiibwa bwa kupàtuka, ne bwa Yesu wàkabiikidiibwa bwa kupàtuka.

59 Ki mùdìbi kabidi leelu! Mbwalu tudi mu cimvundù cya dikema mutùdì emu, ne bantu bàdi bàpanga kumòna Bulelèlà bwa Nzambi, mbwalu kùdi mumvwija mapitèpìte bùngi a Dìyì dya Nzambi makwàtakaja kudi bantu. Nzambi kàtu dijinga ne muntu kampàndà bwa kuumvwija Dìyì Dyèndè to. Yèyè m’Mudyumvwijidi wa Yèyè mwine.

60 Nzambi wàkamba ku cibangidilu, ne: “Bukènkè bwikalèku,” ne bukènkè bwàkiikalakù. Aci kacyèna cikèngela dyumvwija to.

61 Wàkamba ne: “Nsongàakàjì virgo neìmitè difu,” ne Yèyè wàkiimita. Aci kacyèna cikèngela dyumvwija to.

62 Pàvwà . . . Dyumvwija dya Nzambi dya Dìyì Dyèndè mpàdìYe ùDìshìndika ne ùjaadika ne ki mùdìDi nanku. Ki dyumvwija Dyèndè ndyòdì adi, mu kwenza ne Cyènzekè. Ki mwaba wùdì dyumvwija dya Nzambi ngwòwò awu, mpàdìYe wènza bwa Dìyì Dyèndè dyùlè. Yèyè ngudi unùmvwijaDì.

63 Cileejilu bu ne kakùvwakù bukènkè to, ne Yèyè kwamba ne: “Bukènkè bwikalèku,” pààbu kwikalakù, aci kacyèna cikèngela bwa muntu kuumvwijayè to.

64 Kadi twètù tudi tusambakajaMù ndongolwelu mikwàtakaja kùdì bantu, ne, panùdì nwenza aci, nudi—nudi nuDyùmusha mu njila. Ki mutùbi misangu yònsò anu nanku awu.

65 Kadi ncidi anu ngeela meeji mùdìci ne cya kukòka ntema. Anjì elàayi meeji, Maasiyà awu! Bààkapanga kuMumòna bwa cinyi? Mbwalu, balombodi baabo mene bàvwà ne cya

kwikala baMumanyè, bàvwà ne cya kwikala batùkine mu Mifùndù, bàvwà ne cya kwikala bumvwe Mifùndù abu, bòbò ki bààkakèkèkà Muntu ewu bàmba ne: “Mmwànà mulela mu masandi, twa—twamb’eku twamb’eku. Katwèna baswe kwitabuuja Aci to.”

⁶⁶ Bidimu bimane kupita, twètù katwèna twitabuuja nanku to. Tudi bafwànyine kwitaba bwa kufwa anu bwa kwamba ne Yèyè ùvwa Mwànà mulela kudi virgo.

⁶⁷ Ne nebyènzekè dîngà dituku ne, bintu biine bitùdi tumòna Yehowah wènta leelu ewu ebi, bantu mu bikondo bicilwalwà, byòbikù, nebàfwe bwa cintu citùdi twètù twamba leelu ewu eci. Nebikengelè bwa wèwè kucyenza piikalà cimanyinu cya nyama wa lwonji cilwè, ne kùyi ne dyanyisha dya kuyiisha Evanjeeliyo mushindu ewu. Pààlwa didisanga dinene dya maekeleeziya, diine dikaadi dibangè mpindyewu mene bwa bukwaèkèleeziyà edi, wèwè’s newikalè ne cya kutwa citampi ku bujaadiki bwebe pa kufila mwoyi wèbè sungasunga, bwa Cyòci eci.

⁶⁸ Udi ne cya kuCùitabuuja mpindyewu. Bu baakwidi abu mwa kujuuka, biine bààkaMupiisha abu, kî mbafwànyine kuMupiisha to. “Kadi,” mùdi wamba, “bu ne mèmè mvwapù, nunku ndi mwenze cikampànda.” Ee, aci kacivwa cikondo cyebe wèwè to. Kadi, cyebe cikondo’s ncyòci eci, dîba’s ndyòdi edi.

Wèwè udi wamba ne: “Ee, Yèyè wikalakù nanshà kaaba aka’s!”

⁶⁹ Bible mmwambe ne: “Yèyè ùdi umwèumwè awu makèèlèlè, leelu, too ne kashidi,” umwèumwè awu, pa nanku Yèyè’s ùdi kaaba aka. Kadi, Yèyè ùdi kaaba aka. Pàdi buloba bulwè bushidimùke, bulwè butàmbe bunene, bulwè butàmbe kulonga tulaasa apa; Yèyè ùdi kaaba aka mu mmwènekeli wa Nyuma, udibò kabàyi mwa kushebeya anyi kufikisha ku lufu to. Yèyè wàkafwà musangu wumwe; Kèna mwa kufwa kabidi to. Byàkakèngela bwa kuvwijiiibwaYè mubidi bwa Nzambi kushebeyiibwaYè mu mubidi, bwa mpekaatu. Kadi ewu musangu Yèyè kî mmufwànyineku kufwa to; N’Nyuma Mwimpè.

⁷⁰ Mpindyewu, mbya kwela meeji munyi mwàkapetàbo maalu ònsò awu bwa kuMulwisha’s! Cikwabo cintu ncyà ne, Yèyè kààkaswàku kuya kashààla wa mu milongo yabo ayi to. Dìbà adi, nudi numòna’s, aci’s ncivwà anu citungùnùke ne kuMuvwija muntu mubi. Kàvwakù muswe kuya kashààla wa mu malongolodi àbò—àbò awu nansha, kàvwakù muswe kuya kashààla wa mu bwakwidi bwàbò abu, ne Kàvwakù muswe kwikala naabi bwalu to. Ne pashiishe, pa kuumusha byònsò abi, Yèyè uvwa ùteeta kushimbula bìvwàbo bòbò biibàke abi.

⁷¹ Wàkabwela mu ntempelu. Twètù tudi tuMubiikila ne m’Muntu mupòle maalu; ki civwàYe, kadi misangu yàbùngi tutu tuumvwa bibi cidi dipòla maalu.

⁷² Yèyè ùvwa Muntu wa dyabanyangana dya makènga, kadi nansha nanku tutu anu misangu mikwabo tupanga kumvwa cidi dyabanyangana dya makènga. Kî ndyumvwilangana dya luse dyetu dya buntu edi to, aci kî ndyabanyangana dya makènga to. Kadi, *dyabanyangana dya makènga* “nkwenza kwa diswa dya Nzambi.”

⁷³ Yèyè wàkapticila ku ciinà cya mâyi cya—cya Beetèsèdà, ku ciibi aku. Kùvwa bantu balààle panshi mwaba awu, misùmbà ne misùmbà. Misùmbà kî mbûngì kampanda bubala to. Kadi kùvwa misùmba milààle panshi mwaba awu: balèma, mpofo, bilèmèndà, beena bidimba byuminyine. Pèndè nyawu Ùvwa ne dyabanyangana dya makènga ne bantu, misangu yònsò. Kadi kuya Yè kùdì muntu umwepele uvwa kàyi mulèma, mpofo, cilèmèndà, anyi mwena cidimba cyuminine to; pàmwàpa ùvwa ne disaamà dya mpàci wa mènysi, pàmwàpa ùvwa ne bulèmà kampànda bukesè bûkaavwà bulààle bikole. Ùkaavwa naaci bidimu makumi asatu ne mwandamukulu. Kacivwa mwa kumutàcisha to, kacivwa mwa kumushebeya to. Ùvwa mulààdile pa mààtèlâ a bisoosa. Ki Yèyè kwamba ne: “Udi muswe kwondopiibwa anyi?”

⁷⁴ Ki muntu awu kwamba ne: “Ncyèna ne muntu wa kungeela mu mâyi to, kadi pàncidì ngenda ndwa apu, ee, muntu kampàndà ùdi wèla cidya ùmpita.” Nwamònu’s, yèyè ùvwakù mwa kwendela kuulu, ùvwakù mwa kumòna, ùvwakù mwa kwendakana, kadi civwàye ùvwa anu mutekete cyanàana.

⁷⁵ Ki Yesu kumwambila ne: “Juukà. Ambula kalààlu keebe alùkilà kwebe.” Ne bààkela Yesu nkonko pa bwalu abu, bwalu nudi bavùlùke ne Mufùndù mwambe cyôci eci.

⁷⁶ Kabyèna bikèmeshakù to! Bu Yèyè mwa kulwa mu Jeffersonville emu dilòdòlò edi ne kwenza cyenzi cya bwena aci, s’mbafwànyine anu kutùngunuka ne kwakula bwa bwalu Bwèndè.

⁷⁷ Kadi, vùlukàayi ne, Yèyè wàkalwa mbwa kwenza cintu cimwepele, cìvwa ndiswa dya Nzambi. Mpindyewu, aci cidi cisanganyibwa mu Yone Munsantu 5.19, nenùpetè dyandamuna. Yèyè wàkamba ne: “Bulelèlâ, bulelèlâ, Ndi nzwambila ne, Mwànà kèna mwa kuDyènzela cintu nansha cimwe to; anu cidìYe ùmòna Taatù wènza aci, ki cidì Mwànà wènza.”

⁷⁸ Mpindyewu, s’bivwa bikèngela bwa kwikalabò bamanyè ne ki civwa dishindika diine dya ciprofeta cya Mòsà ne: “Bwalu Mukalenge Nzambi wenù neàjuule Mupròfetâ mufwànangàne ne mêmè.”

⁷⁹ Nuvwakù bamòne ne, pàakamònàYe muntu awu, Wàkamba...Yesu ùvwa mumanye ne yèyè awu ùvwa mu ngiikàdilù awu bidimu byàbûngì. Nwamònu’s, bu mùvwàYe Mupròfetâ, Wàkamòna muntu awu mu ngiikàdilù awu; ne Wàkaya kuntwaku wènda ùpènga—ùpènga njila munkaci mwa

bantu abu, wènda ùtòbela ùpìcila mu musùmbà wa bantu awu, too ne mwàkayàYe kasangana muntu kampànda awu.

⁸⁰ KupitaYe ku luseke lwa balèma, bilèmèndà, mpofo, ne beena bidimba byuminyine, pèndè Muntu mùle tètè ne dyabanyangana dya makènga ne bantu's. Kadi *dyabanyangana dya makènga* “ndyenza dya diswa dya Nzambi.”

⁸¹ Mpindyewu, tudi tuMusangana, bu mùvwàYe kàyì muswe kukashàala wa ku bòbò to, Kàvwa muswe kwikala ne cya dyenza nansha cimwe mu milongo yabo amu to, dibà adi Yèyè ùvwa mwipata. Yèyè kàvwa muswe kwikala ne . . .

⁸² Pa kuumusha anu aci, Yèyè wàkabwela mu ntempelu dîngà dituku. Muntu ùbwelamù ne ùsangana nzubu wa Nzambi wàmba kutàpila twìshì anu mùdiye leelu ewu emu. Bàvwa bàsùmba, bàsùmbisha, bashintakaja mfranga. Ki kutònkolaYè mèèsà a dishintakajila mfranga awu; kwangata myonji ne kuyiluka cipya ne kutuuta bashintakaji bàà mfranga abu ne kubàpàtula mu ntempelu amu. Ne kubàtangilaYè ne ciiji, wàmba ne: “Bààkafùnda ne,” aleluuyah, “Nzubu wa Taatù Wanyì nnzubu wa disambila; kadi nwènù nudi bamuvwijè cisòmbedi cya bìvi. Ne nwènù, ne bilele byenu abi, nudi bavwijè mèyì matùma a Nzambi kaàciyi ne bwenzeji nansha bukesè.”

⁸³ Kaa, musùmbà wà bantu bàà mushindu awu mbafwànyìnekù kuMwitabuuja anyi? To, mukalenge. Bàkaavwa badìvwàndàkàje mu bitoci bya ngulube bya tusùmbù twa bantu basungùlùke ne makooya a dituku adi, mu mushindu wà ne bàkaavwa bakwàte dibwe dya mashika a butèndeledi ne kabàciyikù mwa kuumvwa mazakajii bwa a Bukole bwa Nzambi wa Bukole bwònsò to. Kabyèna bikèmeshà to mùvwà mukàjì mutekète awu mwa kulenga civwàlù Cyèndè ne kwondopiibwa ku Cyòci; kadi disàlaayi dikwàcike maalà diMutwila makòdi mwìsù kadiyikù mwa kuumvwa bukolè nansha bukesè to! Mbilondèshìle ku mushindu wùdi useemenaKù's. Mbilondèshìle ku cyùdi wèwè ukèba. Paùdi uya mu ekeleeziya, mbilondèshìle ku cyùdi wèwè ukèba.

⁸⁴ Mpindyewu tudi tuMumòna mwimàne mwaba awu. Kakùyì mpatà to ne bantu bàkaavwa bamanè kumudìmwija, badìmwije . . .mwakwidi ùkaavwa mudìmwije bantu ne: “Mpindyewu Yèyè neàlwe mwab'ewu mu Nsabatù udi ulonda ewu, nenku, pààlwàYe, kanùMuteelejikù to. Mpindyewu, nudi bafwànyìne kulwa kusòmba kaaba aka, kadi kanùteyikù ntèmà ku bidìYe wàmba to, bwalu Yèyè kì ngwa mu kasùmbù keetu to. Yèyè mmuntu mwipata. Kènàku Yèyè ne karta kàà buuwètù to. Kèna nansha mene ne bulongolod- . . .dibeji dya bulongolodi to pàdiYe apu. Kènàku Yèyè ne kantu nansha kamwe kàà mushindu awu to.”

“Yèyè nganyi's?”

⁸⁵ “Nsongààlùmè kampànda wa mupidyè diitabuuja uvwa mulela muneemu emu, mulela mu masandi, mu dîkù dya mukoonyi kampànda wa mabaya, maamù kampànda muMwimite kumpala kwa kusèlanganabò, kadi bàteeta kusokoka bwalu abu ku cintu kampànda cya citàmbe mfùkilu.

⁸⁶ “Twètù tudi bamanyè ne, pààlwà Maasiyà, Yèyè neàtuulukilè ku tujila twà mu Dyulu ne neàye kùdi mwakwidi wetu munene ne neàmbè ne: ‘Kaayifa, ki Mèmè ewu.’” Kadi tudi tusangana ne Yèyè kàakacyènta mushindu awu to, bwalu kabivwa bifunda mushindu awu mu Dìyì nansha. Cilèlè cikwàtakaja kùdi bantu ncìwà cibàfikishe ku diitabuuja nanku awu.

⁸⁷ Dìyì dìvwa dyambè ne Yèyè uvwa ùlwa anu mushindu wàkalwàYe awu. Nenku ki Yèyè uvwa mwimàne awu, ùbala Dìyì, ne ùbàmila ne: “Dituku edi Mufùndù ewu wùlù nwènù badimwène.” Kadi bàcìdi anu bàpanga kuMumòna anyì kuMujingulula, anu mwàkenzàbo mu bikwabo bikondo byònsò.

⁸⁸ Noà ùvwa mufwànyine kwikala mwambe cintu cimwecimwe aci, dituku dyàkabwelàye mu bwàtù ne ciibi kukàngiibwaci adi. Mòsà ùvwa mufwànyine kwikala mubàndishe dìdidiishi adi ku lusongo lwà bwàtù, mutàngile disangisha. . . Vùlukàayi ne, Nzambi ngwàkakànga ciibi aci. Ne yèyè ùvwa mufwànyine kwikala mwambe ne: “Dituku edi Mufùndù ewu wùlù nwènù badimwène,” kadi dîbà dîkaavwa dimane kupita bikolè bwàbò bòbò dîbà adi. Yèyè ùkaavwa muyiishè munda mwa bidimu lukàmà ne makumi abidi, bwa kuteeta kubàfikisha ku dibwela mu bwàtù bùvwàye mwibàke abu, ùbàmila ne Mufùndù awu wùvwa mwambe ne: “EMU MMÙDÌ MUKALENGE WÀMBA, nekùlokè mvula,” kadi bààkindila ntàntà mupitèpìte bule. Kadi Noà ùvwa mufwànyine kwikala mwambe aci anu bipeepèle ne: “Leelu ewu, dituku edi, Mufùndù awu wùlù.”

⁸⁹ Mòsà, dituku dimwedimwe dyàkapwekà Dikunji dya Kapyà pa Mukùnà wa Sinaayi ne kufiladi bujaadiki ku bujaadiki bwèndè adi, Mòsà ùvwa mufwànyine kwikala mwambe ne: “Dituku edi Mufùndù ewu wùlù.”

⁹⁰ Mòsà, nudi bamanyè’s, ùvwa muntu mubiikila kùdi Nzambi, mupròfetà. Ne pàvwàye ùbiikidiibwa apu, bu mùvwàye mupròfetà, bivwa bikèngela bwa kwenzayè dilabula kampànda dya ditàmbe mfùkilu. Bwa kwikalayè mupròfetà, bivwa bikèngela kutwilanganaye ne Nzambi mpala ne mpala ne kwakulayè Nendè. Ne cikwabo cintu, bivwa bikèngela bwa cìvwàye wàmba kwenzekaci, bwa cyanàànà muntu nansha umwe kàvwakù mwa kwikala mumwitàbùje to.

⁹¹ Pa nanku muntu nansha umwe kèna ne bukenji bwa kudibiikila nanku pàdiye kàyi mwakùle ne Nzambi mpala ne mpala, mu mwaba kampànda wà mundekeelu mwa cipeela to, mwàkatwilanganaye ne Nzambi amu, yèyè mwine. Ne bantu bònsò bàdi bàbènga diikalakù dya Nzambi pa buloba kí

mbafwànyine kumunyèngacì ku dyùmvwija nansha; yèyè ùvwa kuntwaku, mumanyè ne ncyenzèke. Bivwa bikèngela bwa mwena Kilisto yònsò kwikalayè mwenze dyôdì dilabula adi kumpala kwa kwambayè nì ncinyi cyònsò cya mùdiye mwena Kilisto. Dilabula dyebe wèwè mwine!

⁹² Mwva nyiikilangana ne mwànà wa balùme wa mwaneetu, katanci aka, nsongàalùme wa citende mwena Katolike, uvwa wamba ne: “Taatu Bill, mèmè’s ndi mulalàkàne mutwè eku ne eku, nya myaba yònsò, nteeta bwa kupetakù cintu kampànda.” Dilòòlò ne dilòòlò dyònsò, kumpala kwa disangisha edi kubangadi, yèyè ùvwa ùdila mwadi. Kadi bufuku, ùvwa anu ùlòòta bilòòtà bya mwikàle ùbwela, ùnyeemena ku cyoshelu, kùvwà diyiisha dyènzekela aku, ùtonda mùvwàye mupùile.

⁹³ Mèmè kwamba ne: “Melvin, kùdì uteeta kuya nansha kwikàle penyì, nansha wèwè mukashàale wa mu ekeleeziya bùngì kaayi, masambila a ‘Mwoyi Mariya’ nansha bùngì kaayi, àudì wenza, anyì mabènesha bùngì kaayi àudì upeta kùdì bantu, bìdì bikèngela bwa ùlediibwè cyàkàbìdì kudi Nyuma wa Nzambi. Ki cintu cimwepele cyàsànkishàku mwoyi wà muntu ncyôci aci.”

⁹⁴ Mbwena kwamba ne, ndi mumanye ne bôbò bàdi ne mupinganyi, leelu ewu, wà mùdibo balediibwe cyàkàbìdì, anu kulabula muiyishi ku cyanza ne kufùnda dìnà dyebe mu mukanda wà mènà. Kadi, nwènù balunda bàànyì, aci’s ndiyi diswika’s. Ki m’Bulelèlè bwa mu Bible to. Bu byôbi nanku, nunku Byenzedi bya Bapostolo, mu nshapita mwi2, bivwa bikèngela kubadiibwaye nunku ewu: “Pàakakùmbanà Dituku dya Mpenta, mpaasàtà wàkapàtuka ne wàkalabula bantu ku cyanza.”

⁹⁵ Kadi mbambe ne: “Pàakakùmbanà Dituku dya Mpenta,” ku dibanjija dya Ekeleeziya, “kwàkalwa cyonà cifùmina mu Dyulu cyenzè bu cipeepèlè cicolè cya civuma, ne cyàkuuja nzubu mujimà uvwabò basòmbèle awu.” Mushindu awu ki wàkalwà Nyuma Mwimpè bwa musangu wà kumpala. Mushindu awu ngùtùYe mulwàlwàlwe misangu yònsò kubangila anu dībà adi. Yèyè ùdi Nzambi, ne kàtu ùshintuluka to. Mpindyewu, Cìdi cilèndwisha bantu’s.

Bôbò bàdi bàmba ne: “Aci civwa bwa dituku dikwabo.”

⁹⁶ Ee, Yèyè’s ùdi umweumwe awu makèlèlèlè, leelu, too ne kashidi. Musangu wònsò wùkaadiku Ekeleeziya mupetè Nyuma Mwimpè, Ùtu mulwe misangu yònsò anu mwàkalwàYe musangu wà kumpala amu, bilondèshile kabeji kàmwèkàmwè kàà bwanga aku, Byenzedi 2.38; kàkàtukù kanji kushintuluka, ne kàkààdyàkushintulukakù to.

⁹⁷ Byenzè mùdi kabeji kàà bwanga kàà ngangabuka bwa disaamà kampànda. Yèyè neáfundè kabeji kàà bwanga bwa disaama, ngangabuka awu. Kadi ndàaku naaku kùdì mwenji

wa manga a lwôndapu wa mafi, yêyè ùdi wèlamù ncìpaja-mulungù mupitèpìte bûngì, bwanga bùdi bushààla kabùyi bukolè to mu mushindu wà kabùyikù mwa kukukwàcisha to; yêyè mwelèmu mulungù mupitèpìte bûngì, nebùkushebèyè. Kàdi ne cya kufundiibwa anu bilondèshile ngangabuka.

⁹⁸ Nenku kabeji kàà bwanga kàà ngangabuka bwa kupeta Nyuma Mwimpè nkatupèèsha kùdi Ngangabuka Simonà Peetèlò, mu Dituku dya Mpenta. “Mémè nènùnupèèshè kabeji kàà bwanga. Nyingàlálaayi, muntu ne muntu wa kunùdi, ne nùbatijibwè mu Dìnà dya Yesu Kilisto bwa dilekelediibwa dya mpekaatu yenu, nenku nenupetè kupà kwa Nyuma Mwimpè. Bwalu kabeji kàà bwanga aka kàdi bwa aba bàdi kule, ne mu bûngì bwònsò bwàbiikilàbo kùdi Mukalenge Nzambi wetù abu.” Kabeji kàà bwanga kàà Cyendelele!

⁹⁹ Mòsà wàkenza dilabula edi. Wàkabwela mu ditungà ne wàkabanga kwambila bantu ne: “Ndi mutwilàngàne ne Dikunji dya Kapyà. Dìvwa mu kaacipuka kàà kàlakuka kapyà. Ne Yêyè kungambila bwa nzwambilè ne: ‘NDI EWU ÛNDÌ. Ndà kuntwaku; Mémè nêngiikalè neebe. Angata dikombo didi mu cyanza adi udikwàtè muulu pa Èjiipitù, cyònsò ciwàlombà aci, necyènjiibwè.”

Ee, pàmwàpa mwakwidi kampàndà wàkamba ne: “Macimbu’s wè!”

¹⁰⁰ Kadi pàakamònàbo byenzedi bilelèlà bya cyòci eci, byènza, byènzeka, kabàvwa mwa kucilama kabidi ntàntà mule to. Bàakamanya ne yêyè ùvwa mutùma kùdi Nzambi.

¹⁰¹ Dìbà adi, Mòsà yêyè mwambe ne wàkamòna cyòci aci, ne mucifidile bujaadiki ne m’Bulelèlà, dìbà adi Nzambi mmwenzèjiiibwe, piikalàci Bulelèlà, bwa kumanyisha ne kushindika dìyi dya muntu awu, ne mBulelèlà. Ncya bushuwa.

¹⁰² Piikalàbi ne Yesu Kilisto wàkiimana mwaba awu ne wàkabala, dituku adi ne: “Dituku edi Dìyi edi dyùlù kumpala kwenu,” Nzambi mmwenzèjiiibwe bwa kwenza ne Dìyi adi dyènzekè.

¹⁰³ Twètù tudi twimana apa dilòlò edi twamba, ne: “Yesu Kilisto ùdi umwèumwè awu makeelela, leelu, too ne kashidi.” Nzambi mmwenzèjiiibwe bwa kujaadika ne bìdi nanku, bwalu N’Dìyi Dyèndè. Mpindyewu, cidi cyènza cinyi? Bìdi bìkèngela diitabuuja, bwa kuCiitabuuja. Bìdi bìkèngela diitabuuja, bwa kwitabuuja Dìyi Dyèndè, bwa ne Dyòdi didi Bulelèlà.

¹⁰⁴ Mònaayi cyàkenzekà pàakapàtulà Mòsà bânà abu, ne bònsò bàakamulondà abu. Aba bàvwà kabàyi balondè abu bàakashààla mu Èjiipitù. Kadi aba bàakalondà Mòsà abu, pàakapàtukàbo mu Mbù Mukunze ne kubwelabo mu cipèèlà, Nzambi wàkatùuluka pa Mukunà wa Sinàayi. Dikunji dya Kapyà adi dyàkashiya mukunà mujimà awu mukwàte kapyà, ne Dìyi kwakulamù, ne Nzambi kufila Yè mèyi matùma dikumi.

105 Mòsa ùvwa mufwànyine kwikala museemène kumpala kwa bantu aku, wàmba ne: “Dituku edi Mufundù wùntù munwàmbile awu, mèmè bu mupròfetà Wendè, wùlù dituku edi. Ndi munwàmbile ne Nzambi mmutwilàngàne naanyì, mu kaacipuka kàdì kàlàkuka kapyà mwàmwa, mu Dikunji dya Kapyà, ne Yèyè mmwambè nunku: ‘Mèmè nèn- . . . Eci necìikalè cimanyinu. Newàlukilè ne bantu abu cyàkàbìdì kaaba aka.’ Nenku’s ki Nzambi awu, mu Dikunji dya Kapyà dimwedimwe dìmvwà munwàmbile ne ki mùvwàYe ùsanganyiibwa amu, mulembèlèle pa mukùnà apu. Dituku edi ciprofeta eci cyùlù. S’ki Yèyè ewu bwa kushindika ne bintu bìndì mwambe bìdì Bulelèlà.”

106 Nzambi àtùpèèshèku bakwabo bantu bàà mushindu awu, bàà kweyemena ne bàà meeji matòòke, ne bàmba Bulelèlà, bwa Nzambi wa Bukole bwònsò àshindikèku ne Dîyì Dyèndè dïcìdì anu Bulelèlà! Yèyè ùdì anu ùshààla umwèumwè awu makeelela, too ne kashidi. Yèyè mmufwànyine kubènga kucyènza bwa cinyi? Yèyè’s mmulaye bwa kucyènza.

107 Yoshùwà ùvwa mufwànyine kwikala mwambe bya mwomumwe, dituku dyàkaalukilàye ku Kaadèsà-baanèà adi, kùvwàbo bendè lwendu lule mu cipeela. Bàvwa bèèla mpatà ne buloba abu kabùvwa buloba bwa mushindu wùvwa Nzambi mwambe ne mmùvwàbu mwa kwikala abu. Kadi Nzambi ùvwa mubàmbile ne bùvwa mbuloba bwìmpè, mùvwà mabèèle ne bwìcì bituuta nkòkà. Kadi Yoshùwà ne Kaalèbà mbàvwà anu bóbò babìdì abu bàvwà mwa kucìtabuuja, mu bakwabo dikumi bàvwà bashààle abu. Pààkaalukilàbo, bàvwà ne cileeeji; bàvwà ne cisumbù cya tumuma twa mvinyò cìvwà anu bantu bàà makàndà babìdì mwa kwambula.

108 Yoshùwà ne Kaalèbà bàvwà bafwànyine kwikala biimàne mwaba awu mene ne bambe ne: “Dituku edi Mufundù ewu wùlù. S’ki cileeeji ncyòcì eci cya ne mbuloba bwìmpè.” Bushuwa’s. Bwa cinyi? “S’ki cileeeji ncyòcì aci cya ne mbuloba bwìmpè. Nkwèpì kunùdiku bafwànyine kupeta bintu bya mushindu wà byòbì abi, mu Èjiipitù mwàmwa? Kamùvwà myaba ya mushindu wàwa to. Kadi dituku edi Mufundù ewu wùlù.”

109 Yèyè ùvwa mufwànyine kwikala mwambe cintu aci, cimwecimwe aci, pààkambàye ciprofeta wàmba ne bimanu bya Yelèkò bìvwa mwa kuupuka pàvwàbo mwa kwikala banyùngùlùke misangu mwandamutekète, matuku mwandamutekète, misangu mwandamutekète ku dituku. Nenku pààkanyùngulukàbo bwa musangu wà ndekeelu awu, bimanu abi byàkuupuka. Yoshùwà’s ùvwa mwa kwikala mwimàne ne mwambe ne: “Dituku edi, Kàpìteenà Munene wa cilwilu cya Mukalenge uvwa mungambìle kùkaadi mbingu ne bìvwa mwa kwenzeka mushindu awu, dituku edi Mufundù ewu wùlù.” Ki bimanu mbyòbì abi, bilààle panshi. “Lwàyaayaakù, tùyaayi tükwatè cimenga. Ncyetu. Dituku edi Mufundù ewu wùlù.”

110 Bilenga bya dikema's, balume bàà Nzambi batwè nyama ku mikolo bintu bìdì bya cya bushuwa!

111 Izaleela, ku musùlù, pààkakwàtábo buloba abu, pààkasabukábo. Nebàcyènzè munyi? Mmu ngondo mwináyi. Dipaasalala dya máyi didi dilwa bwalu nêjè ùdì wènguluka, mu Yudààya mwámwa. Kaa, Nzambi wàkamwèka bu kalààlà kàà màsàlaayi kàà mushindu kààyi kàà kakwàte ne bya luse, bwa kulwa ne cisàmbà Cyèndè kuntwaku, mu ngondo mwináyi amu, mùvwa musùlù wà Yadènè mùle ne mu malèngè kutàmba bya kwònsò eku. Misangu mikwabo. . .

112 Mvwa mufwànyine kwimana kaaba aka, bu mèmè ne díbà, bwa kunùpèeshakù kààdyosha. Misangu mikwabo wèwè udi mufwànyine kwikala musòmbe mwaba awu ne dísaamà dya kànsèrè, anyi mufwànyine kwikala musòmbe ne dísaamà kampànda, udyàmbidila ne: "Mona's, mèmè ewu, mwikàle mwena Kilisto mujimà, mufwànyine kwikala mu mushindu ewu? Ndi mufwànyine kwikala musòmbe mushindu ewu bwa cinyi, piikalàbi ne ndi mwena Kilisto?" Misangu mikwabo Nzambi ùtu ùlekela maalu àlwa mídimà bikole mu mushindu wa kùyikù mwa kumòna muulu, ku nseke, anyi myaba mikwabo kanà yònsò, kadi díbà adi Yèyè ùlwa ùkupengela njila bwa wèwè kupìcilamù, bwa wamòna mwa kwamba ne: "Dituku edi Mufùndù ewu wùdi munkaci mwa kuula, wàkalayàYe bwa kwenza."

113 Yèyè wàkalekela bàna bàà beena Ebèlù abu bàbwela buludì mu cikùtù cya kapyà. Bòbò kwamba ne: "Nzambi wetù twètù ùdì ne bukole bwa kutùsingila ku kapyà kàà mu cikùtù aka. Kadi, nansha kabìyi nanku to, katwàkwaminakù lupingu lwebe alu to." Pààkamùpàtukàbo, mupùùyà wa cikùtù cya kapyà aci pambidi pààbò. . .to, kabàyi ne kaamupùùyà kàà cikùtù cya kapyà aci nansha kakese's wè, pambidi pààbò; s'vàvwa bafwànyine kwikala bambe ne: "Dituku edi Mufùndù ewu wùlù."

114 Pààkapàtukà Danyèlè mu bwinà bwa ntambwe, yèyè's ùvwa mufwànyine kwamba cintu cimwecimwe aci.

115 Yone Mubàtiji. Paanyima pàà bidimu nkàmà yinaayi ya dilongesha dya butèndeledi, kabýèna bikèmesha mùvwà ekeleeziya awu mu cibwejàkàjì mu cikondo aci to! Pààkamwènekàye mu cipèèlà, ku Yadènè, yèyè's ùvwa mufwànyine kwikala mwimàne ku mwelelu wà máyi aku, mwàkiimanàye amu, mwambe ne: "Dituku edi Mufùndù ewu, wà Yeshààyi 40, wùlù."

116 Mushindu mwine wùndiku mufwànyine kwimana kaaba aka ne kunwàmbila civwà nsaserdose mukùlàkàjì awu mungambile's we! Wàkamba ne: "Mwanàànyi, kwènà mujikìjekù Diyiisha adi to."

Mèmè kwamba ne: "Tùùkijà."

Yèyè ne: “Udi muswe kwamba ne beena Mpenta bàba kabèèna bà mòna aci anyi?”

Mémè ne: “To.”

117 Yèyè kwamba ne: “Mémè ndi ncimòna.” Wa bwalu, nsaserdose wa Katolike’s! Uh-huh. Yèyè ne: “Kwèna mutùngùnùke bwa cinyi?”

Mémè ne: “Tùùkijà.”

Yèyè ne: “Butùmbi kùdi Nzambi! Mémè ndi ncimòna.”

118 Bu pa dyòdì dîbà adì ki Nyuma Mwîmpè kulwaYè pa mwanààbò wa bakaji, uvwa musòmbè mu disangisha amu. Ki kukàtamukayè, kwakulaye mu myakulu myenyi, ne kufilayè dyumvwija dya cintu ciine citùvwà twamba mémè ne nsaserdose awu, pa cibumba cya ku cyambilu apu. Ekeleeziya mujimà, mwaba mujimà awu, kukùtukapù mbilà mikole. Kutùngunukabi too ne mu mpwìlu wa Oral Roberts lumingu lwàshààdi elu, anyi lumingu lwà kumpala kwa lwàshààdi elu, ne ki cìvwà muyiiki wà mu mpwìlu awu. Mùvwà nsaserdose awu . . . Musòmbè mu bwenzeji bwa Nyuma Mwîmpè, mubuulwila mwaba awu kùdi muntu mukaji, ngeela meji ne ùvwa mmwanààbò wa bakaji, cìvwà munkaci mwa kwenzeka pa cibumba cya ku cyambilu apu aci, ne kubuululayè cintu citùvwà tusokoka aci.

119 Dîbà ditùdì ne mwoyi edi, dituku edi Mufùndù ewu wùlù. Dituku edi Makènke a dilòlò mmalwe, kadi twètù tupanga kuCimòna. Mònaayi.

120 Yone wàkamba ne: “Dituku edi mémè ki ‘dìyi didi dyèla lubilà mu cipèlè,’ mwàkambà muprofètà Yeshàayi ne: ‘Longòlòlaayi njila wa Mukalenge!’”

121 Kabàakacyùmvwà to. Bàakamba ne: “Kaa, wèwè udi Yesu . . . udi—udi Kilisto,” nanku’s wè.

122 Yèyè kwamba ne: “Mémè ncyèna Kilisto to.” Yèyè ne: “Ncyèna mukùmbànyine kusùulula nshinga ya bisàbaatà Byèndè to. Kadi,” mwàkambàye, “Yèyè mmwimane munkaci mwenu amu, mwaba kampànda,” bwalu ùvwa mutwishìibwe ne Yèyè ùvwa mwa kwikalapù. Ùvwa mwa kwikala mu dituku dyèndè adi, bwalu Nzambi ùvwa mumwambile ne yèyè nguvwa ne cya kuleeja Maasiyà kùdi bantu.

123 Dìngà dituku ki Nsongààlùmè kampànda kulwaYè tàmakàtamàkà too ne mwaba awu, nenku yèyè kumòna bu Bukènke kumutu Kwèndè, cimanyinu kampànda. Ki kwelayè lubilà lukole ne: “Mònaayi Mwànà wa mukooko wà Nzambi! Dituku edi Mufùndù ewu wùlù kumpala kwenu.” Bushuwa’s.

124 Mu Dituku dya Mpenta, mushindu mwine wàkiimanà Peetèlò ne kutèèlayè Mufùndù wàbò awu, wà Yowèla 2.38. Pààbò, s’bàvwa bònsò munkaci mwa kuseka, bòbò bantu abu. Kabàvwa mwa kwakula mu mwakulu wàbò sungasunga to.

Bàvwa bàkukumina cintu kampànda cikwabo. Bible mmwambe ne: “Ndimì mipandùlùke.” *Mipandùlùke* ndudimi “lwabùlùke,” kalùyi ne cìdilu lwàmba to, lùkukumina anu cyanààna. Bànyeemakanangana eku ne eku bu bantu bakwàcike maalà!

¹²⁵ Kwambabò bònsò ne: “Ee, bantu aba mbakwàcike maalà. Bàngilaaayi nùmonè, tàngilaaayi nùmonè mùdibo bènza, bakàjì ne balùme bàba. S’bàdi bènza maalù mu cimvundu,” mwàkambàbo kùdì musumbà wà batèndeledi bàà mu dituku adi abu.

¹²⁶ Peetèlò kjuukayè munkaci mwabo, kwambayè ne: “Balùmyàna ne bânà beetu, nwênù bàdi basòmbèle mu Yèlusàlèma, ne nwênù bàdi basòmbèle mu Yudaàya, bwalu ebu bùmanyiibwè kunùdi ne bantu aba kí mbakwàcike maalà to, munùdi nwênù nucinka amu, pa kumòna ne tucidi anu pa dîbà citeema wa dituku. Kadi eci ncyàkambàbo kùdì mupròfeta Yowèlà ne: ‘Nebyènzekè ku matuku a ndekeelu ne, Mémè nèmpongololè Nyuma Wanyì pa mubidi wònsò.’ Dituku edi Mufùndù ewu wùlù.” Cya bushuwa’s.

¹²⁷ Luther wàkafika anu pa dîbà. Wesley wàkafika anu pa dîbà. Mpenta wàkafika anu pa dîbà. Kakwèna cidi kaciya mu bulongame to.

¹²⁸ Mpindyewu ndi nnùlòmba bwa nwênù kwelangana meeji pa cikondo ne dîbà mutùdi ne mwoyi mpindyewu, pamwe ne Dìyi dilaya dya leelu. Pìikalàbi ne kale mu bikondo bikwabo mwàmwa, bantu bàvwa bafwànyine kwamba ne, “dituku edi Mufùndù ewu,” “dituku edi Mufùndù ewu,” dîbà adi twámbe munyi bwa Mufùndù wà dituku edi? Cidi cilaya bwa dituku edi ncinyi? Tudi biimàne penyì? Mmu dîbà kaayi mutùdi ne mwoyi emu, mùdi ntankù ùtuuta, ntankù wa beena maalù a mamanya awu ne, nkushàale tusunsa tusatu bwa dîbà mundankùlù? Buloba mbupetè dibinduluka. Ekeleeziya ùdi mu bulàalù bwa dibola. Kakwèna muntu nansha umwe udi mumanye mwaba wùdiye mwimànyine to. Tudi dîbà kaayi dya dituku? Kadi bishi bwa Mufùndù bwa dituku edi? Ngiikàdilù ya ekeleeziya, anyi, ngiikàdilù ya ekeleeziya leelu!

¹²⁹ Pa buloba, cidiidi, ndongolwelu wetù wa buloba, mbibole bipangè ne mwa kubola. Mémè ncyèna mwena cidiidi to. Ndi mwena Kilisto. Kadi, ncyèna ne bwalu bwa kwakula bwa cidiidi to, kadi ndi muswe anu kwamba ne mbibole ku nseke yònsò yibidi.

¹³⁰ Nkàadi mwele kakàndà kàà masungulangana musangu wumwepele, bùvwa mbwà Kilisto; bikèngela nciimunè. Dyabulu mmwelè kèndè kakàndà bwa kundwisha, kadi Kilisto mmungeelèlè mèmè; mbilondèshile ku mushindu wùndi mwelè kiine kakàndà kàanyi aku. Ndi ne disànkà dya kwikala muMwelèlè Yèyè kakàndà aku; bàà pa buloba bàmbè cidibo baswè kwamba aci. Mémè nciidi anu mwitabùtje ne Yèyè

ùdi umwèumwè awu makeelela, leelu, too ne kashidi. Yèyè ngwacijaadika. Neàcijaadikè cya bushuwa. Cya bushuwa.

Divulangana dya bwenzàvi, dinyanguka dya nsòmbelu wa bàna!

¹³¹ Tàngilàayi ditùngà dyetu, dyòdi òdìwà kale wàwa cilòngò cya buloba adi, mungàlàatà wètù munene awu kale wàwa wàkenjiibwa mu—mu...dituku dya òdìyì dya patòòke dya dipàndà, nenku òdìyì dya patòòke dya dipàndà bààkatwàpu byàlà, nenku twètù kupeta mungàlàatà, ne bankambwà beetu, ne bintu byàkenzàbo, twètù's tuvwa ne ditùngà dinene.

¹³² Kadi patùdi twakulangana apa ki kuboladi eku, dyènda dyùpuka, ne dinyùkuka, ne dipweka ne màyì. Ne bàdi bàteeta bwa kufucisha bantu bitadi, bwa kupetabò mfranga ya kutùminanganabò dyàmwàmwa, bwa kusùmbabò bulunda kùdi beena lukunà bààbò; abu pààbò bàdi bayìpingaja bàtwàsayi mumpàla. Mvita ya buloba bujimà yimwe, mvita ya buloba bujimà yibidi, kadi bacikàle anu batùngùmùke batàngile ku mvita miisàtù. Cya bushuwa's. Cidiidi ncibolè, cinyangùke, ncibolè too ne ku muji. Anu menemene cidi Maatàayi 24 mwambe ne ki mùvwàbì mwa kwikala ne: "Ditùngà nedilwishanganè ne ditùngà naadi, bukalenge nebùlwishanganè ne bukalenge." Bintu byònsò ebi mbìvwà ne cya kwenzeka. Tùtangilàayaaku byòbì ebi mpindyewu. Eyo.

¹³³ Monaayi cikwabo cintu, divulangana dya dikèbulula mu maalu a mamanya. Mpindyewu, musangu kampànda, anu...Kaakù wanyì mulùme ùvwa ùya katàngila kaakù wanyì mukàji, mu ditempu dya bàkòka kùdi ngombe. Patùdi twakulangana apa cikaadi nkandèkè kàà jet, anyì pàmwàpa mene mpoko mutùma mu lupeepèle, ùkabwela ne dyàmwàmwa dya cibwàshìbwàshì. Bunene bwàci...Mmunyi, nganyì udi mwambe cyòci eci? Danyèlè 12.4, mmwambe ne: "Dimanya nedivulanganà mu matuku a ndekeelu." S'tudi tumòna dibà ditùdi ne mwoyi. Mònaayi mpindyewu ngiikàdilù yidi—yidi buloba bùsanganyibwa, ngiikàdilù wa maalu a mamanya.

¹³⁴ Nenku mònaayi kabidi, leelu ewu, mu ndongolwelu wètù wa maalu a bulongeshanganyi bwa tulaasa. Mpindyewu kanùteeci bwa kuvila cyòci eci nansha. Mèmè ndi ne tupese twa bibèjibeji, bàlongeshangana disangila dya balùme ne bakàji mu ekeleeziya yetu...mu bilongelu byetu, mùdi balongi batekète mwa kwikalabò bènza disangila dya mulùme ne mukàji, bwa kumòna ní bàdi mwa kukùmbanangana pa buloba. Eyowa's, mukalenge.

¹³⁵ Kadi bìshi mu bunsaserdose bwetu twètù? Dilòlò edi ndi ne kapese kàà cibèjibeji. Mu Los Angeles, mu Californie, mùvwà musùmbà wa balombodi bàà maeeleeziya, ba-Baptistes ne ba-Presbytériens, bambi, balwè ne musùmbà wà babàkyanganyi bàà balùme ne balùme ne kwenzabo disangila dya balùme ne balùme, bàmba ne bàvwa bàteeta bwa kubàfikisha kùdi Nzambi. Pàabi,

s'ki wumwe wà ku milawu ya dîbà edi, bwena Sodomà! Ne mikenji ya ditunga kubàkwàtayi mene.

¹³⁶ Mpindyewu tudi panshi anyì tudi pa kazubu? Ndongolwelu wetù mu kaabujimà's wátùbolèdì ku mápà. Ndi mumòne divulgana dya disangila dya balùme ne balùme mu États-Unis dibànde ne bya pa lukama makumi abidi anyì makumi asatu kupita cidimu cyàshààdi eci. Anjì elààyibì meeji ku bwalu abu, mulùme ùlààla ne mulùme nendè, anu mwàkenzàbo mu Sodomà menemene.

¹³⁷ Divulangana dya bwenzàvì, dinyanguka dya nsòmbelu wa bàna! Tudi ne mwoyi mu dîbà kaayi? Dituku edi Dìyì dya cipròfetà edi's dyùlù.

¹³⁸ Bukwàntèdeleedi, ekeleeziya yêyè mwine, ekeleeziya, ekeleeziya mubiikila bwa kupàtuka awu, utùdì tubiikila ne ng'ekeleeziya mubiikila bwa kupàtuka awu, cikondo cya ndekeelu cya ekeleeziya, cikondo cya ekeleeziya cya beena Mpenta, cidi penyì? S'cidi mu Laodikiya, mùdì Mufùndù mwambe.

¹³⁹ Leelu wa Ndaaya ewu's bàkaadi balekèlèle biibi bwàshì. Bakàjì bààbò mbavwàle bu bàdì kabàyi bavwàle. Balùmè bààbò bàdì. . . S'ncintu cibì cya dikema. Bamwe bàà kùdìbo babwelè mu dibàkà misangu yisatu anyì yinaayi, mu tusumbù twa balami, ne bikwabo byònsò. Bààlekèlèdì biibi, ne bààbwejì dibola, bwalu bènjì nsangilu ne bàditéèki kaaba kamwe ne bàà pa buloba.

¹⁴⁰ Nenku, leelu ewu, bàkaadi ne bitanda bitàmbe bulenga, kutàmbe bya kwònsò eku. Mu mwaba kampànda, umwe wa ku yôyì ùdì munkaci mwa kwibaka dibàlaasà dya diyiila ndola mìliyò makumi ataanu, ndola mìliyò makumi ataanu. Beena Mpenta! Kale wàwa bivwa mu masangu a njila, kùkaadi bidimu makumi abidi ne bitaanu, bìmba ngoma. Bàmba ne: "Tudi. . ."

¹⁴¹ Bwalu, Mufùndù mmwambe, mu Bwàkabuulwibwà 3, ne nudi "Babanji,' mwambe ne: 'Ndi mubanji. Ndi musòmbe bu mukalenge-mukàjì. Ncyèna nkèngela cintu to.' Kadi kwèna mumanye ne udi mukèngeledi wa luse, mukèngi, mupele, butaka, mpofò, kadi kùyi mumanye to!"

¹⁴² Dituku edi Mufùndù ewu wùlù mu mèsù mwenu. Amen! Amen mbwena kwamba ne "biikalè nanku." Ncyèna nditwa mèmè mwine amen to, kadi ndi muswe kwamba ne ndi ngiitabuujà ne Cìdì Bulelela. Dituku edi Mufùndù ewu wùlù.

¹⁴³ Ekeleeziya wa beena Mpenta ùdì mu ngiikàdìlù wa Laodikiya. Kaa, bòbò's bacidì anu bàtùpika bèèla mbilà, ne bènza bikàsà pàdì mùjìkì wìmba apu. Pàdì anu mùjìkì wìmana, anyì mùjìkì wà baamùyàpàndì wùdì bamwe bàà kùdìbo bìmba ne bàbiikila ne mbwena Kilisto awu, ne dîbà kanà dyònsò didìwu wìmana adi, butumbi bwònsò bùmba bùyà's. Eyowa.

144 Dyôdi diikàlè ditumbisha dilelela dya Nzambi, kakwèna tushibà búngi bukumbàne ne bukole búngi—búngi bukumbàne pa buloba apa bwa kudiìmanyikakù to. Cyôci bulelèlè cìfùmina kùdi Nzambi, kabyèna bikèngela bwa kutuuta mìjikì miine ayi to. Bikèngela Nyuma wa Nzambi àtuulukèpu. Ki cìdì cyènta ncyôci aci.

145 Kadi bàkaadi baCipwe mwoyi kùkaadi ntàntà mule, bwalu bàkaadi batèèke dipà dya Nyuma Mwìmpè ne, “cileeeji cya nzànzànzà cya dyakula dya mu myakulu.” Kadi mémè’s nkààdikù muumvwe demons ne baloji bààkula mu myakulu.

146 Nyuma Mwìmpè n’Dìyì dya Nzambi munda mwebe, didi diDìmanyishà mu kwitaba kwa Dìyì. Pa kuumusha aci to, kacyèna mwa kwikala Nyuma Mwìmpè nansha. Cyôci cyàmba mùdici Nyuma Mwìmpè kadi cìvila Dìyì dimwe cyanàànà dya Bible, kacyèna mwa kwikala Nyuma Mwìmpè to. Aci ncileeeji cya ne wèwè udi witabuujà anyì kwèna witabuujà.

147 Mònaayi cikwabo cimanyinu cinène. Beena Yuda bàkaadi mu buloba bwabo; ditùngà dyabo sungasunga, lupetu lwabo sungasunga, bàkaadi cidimba cya ONU. Bàkaadi cilwilu cyabo sungasunga. Bàkaadi ne bintu byònsò. Bàkaadi mu buloba bwabo; cyôci aci, ncyàkambà Yesu ne: “Nùyiilè lusumwinu lwa mucì wà mfigì.” S’ki bòbò abu, bàkaadi baalùkile buludi mu ditùngà dyabo. Dituku edi Mufundù ewu wùlù, beena Yuda mu buloba bwabo.

148 Dituku edi Mufundù ewu wùlù, Cikondo cya Ekeleeziya wa Laodikiya.

149 Dituku edi Mufundù ewu, Maatàyì 24, wùlù. Buloba bùdi búsanganyiibwa mu dibola, cintu cyònsò mu kaabujimà; matùngà àlwishangana ne matùngà makwabo, dikanka dya buloba mu myaba mishiièshiiàngàne, mvùnda minene yìpweka, yìnyungisha matùnga, ne bikwabo, makenga manene mu myaba yònsò. Dituku edi Mufundù ewu wùlù.

150 Mpindyewu twàjandùlù ngiikàdìlù wa buloba. Tudi tumòna mwaba wùdi ekeleeziya anu mùdì yònsò—anu mùdì yònsò, bulongolodi, dingumba, tudi tumòna mwaba wùdìbi. Tudi tumòna mwaba wùdi matùnga. Ne tudi tumòna ne dituku edi milayi eyi yùlù.

151 Mpindyewu, kadi mu dituku edi mùdì ne cya kulwa Dimiinu dya Bukalenge dya Abraham, ditàmbidile. Kì cyôci aci menemene cìvwàDi mwa kwikala, cìvwa mwa kwikala Mukàjì-musèla wa Bukalenge bwa Mwànà mulaya, wa Bukalenge awu. Mùmvwà ngamba makeelela dilòlò, kadyàkwikala dimiinu dya mubidi nansha, nedìikalè Dimiinu dya nyuma. Kùdi ne cya kujuuka Mukajì-musela wa nyuma, wìkala Dimiinu dya Bukalenge dya Mwànà wa Bukalenge wa Abraham ku Diitabuujà dya Bukalenge. Bikèngela Àbwelè mu cyalu mu

matuku a ndekeelu, ne cikondo ne mwaba bìdi mmulayi muMupèèsha Yèyè.

¹⁵² Bilondèshile Maalàkì 4, Mufùndù, kùdi ne cya kujuuka Mukenji wànyungishà myoyi ya bantu wùyààluja cyàkàbìdì buludì ku baataatù bàà bùupostòlò. Kùdi ne cya kujuuka kampànda mu cyalu, mu bukole bwa Eliyà, wíkala mwa kujuuka mu cyalu; muntu kampànda wa mu cipèèlà wapàtuka, ne wíkala ne Mukenji wàpinganjanà cyàkàbìdì buludì ku Dìyì. Ki dìbà ditùdì twètù ne mwoyi ndyòdì adi.

¹⁵³ Dìbà adi, nùtangilàayi mpindyewu, ndi nnùkonka pa dìbà edi, nwènù beena muneemu mu Jeffersonville. Mu cidimu cya 1933, Bukènkè butàmbe-mfùkilu bwàkapòna ku musulu kwàka abu, dituku dìmvwà munkaci mwa kubàtiiza bantu nkama yitaanu mu Dìnà dya Yesu Kilisto abu, mucìkàle mwànà ne balùme wa bidimu bu makumi abidi nanku. Ncinyi cyàkambàDi, nwènù Jeffersonville? Cìvwa ncinyi kwinshi kwa mùsèsù wà Spring Street kwàka, pàvwà cibejibeji cya *Courier Journal*, ngeela meeji ne cìvwa ncyà *Louisville Herald*, cipàtùle kaabwalu kàaCi aku? Dyàkaya too ne ku Associated Press, kuya kabwela too ne mu Canada. Docteur Lee Vaye kukòsayè kapesè kàa cibejibeji aci, mu Canada mwàmwà, mu cidimu cya 1933.

¹⁵⁴ Pàmvwà mbàtiiza muntu wanyì wa dikumi ne mwandamutekète, mwinshi mwa Ntemu ewu; ne nwènù nudi bamanyè bikwabo bya bwalu abu. Nenku pàmvwà mwimane mwaba awu, munkaci mwa kubàtiiza muntu wa dikumi ne mwandamutekete, Bukènkè kupwekabu bùfùmina mu Dyulu, bukenkèshe mwaba awu, cyenzè bu Mutooto wùmata wùfùmina mu Dyulu. Dìyì kwambadì ne: “Anu mwàkatùmiibwa Yone Mubàtiiji bwa kudyànjidila dilwa dya kumpala dya Kilisto, Mukenji wèbè wèwè newùdyanjidilè Dilwa Dyèndè diibidì, pa buloba bujimà.” Dituku edi Mufùndù ewu wùlù.

¹⁵⁵ [Disangisha didi dicyònkomoka—Muf.] Dituku edi! [Disangisha didi dicyònkomoka bikole ne ditùmbisha Nzambi.] Nzambi ngwàkacilaya. Cìdì cyenzèke ncinyi? Dituku edi nCiyè buloba bujimà.

¹⁵⁶ Nenku pàakapwekà Nzambi mwaba awu ne kwambaYè cyòcì aci, pàncìvwà mwànà mukese, mu kaacipuka kàvwà kàteema kapyà, anyi kaacipuka kuntwaku, kakwàte kapyà ne Dikunji dya Kapyà, lwà kwa Wathen eku pa Utica Pike; mwikàle nsuna màyi kuntwaku, nguumukila ku diyeebà kwàka mutàngile ku cyengedi cya maalà, nudi bamanyè bulelèlà bwa bwalu abu. KwambaYè ne: “Kùnukù mfwankà to, anyi maalà, anyi kùkooyishi mubidi wèbè to, bwalu kùdi mudimu wà wèwè kwenza pawàkolà.” Ndi njaadika ne cyòcì aci m'Bulelela ne, ngàkaCimòna. Nenku Nzambi, anu mwàkenzàYe ne Mòsà amu, wàkaakula mwaba awu kumpala kwa disangisha kuntu kwàka, wàmba ne: “Eci m'Bulelèlà.”

Dituku edi Mufundù ewu wùlù munkaci mwetu.

¹⁵⁷ Tàngilàayi cyàkambàYe bwa dijingulula, ne mùvwàdi mwa kwikala; kuumuka ku dibàtentekela dya byanza, kuya ku dimanya dya bwalu busokòme bwa mu mwoyi. Dituku edi Mufundù ewu wùlù mèsù etu madìmwène.

¹⁵⁸ Milayi yàkafidiibwà eyi, mònaayi, milayi yònsò eyi yàkashindikiibwa ne yàkuujiibwa kùdi Nzambi wa mwine mulayi awu. Tàngilàayi, mmukùdika mu Washington, DC mwàmwa, dilòòlò edi, fòtò wa Mwanjelo wa Mukalenge!

¹⁵⁹ George J. Lacy, mfumu wa mikanda mitwa byàlà ya FBI bwa bukalenge bwa États-Unis, pàakaMukenketelàye ku Houston, mu Texas, ne kwambayè ne: “Ewu n’Kampana umwepele mutàmbe mfùkilu ukaadiku kacya mukwàciibwe fòtò bwa pa buloba bujimà.” Udi ne cya kumanya; bwalu yèyè ki mumanyi mupilùke pa buloba bujimà, bwa cyòci aci.

¹⁶⁰ Mònaayi, ki Yèyè udi mukùdika wàwa, bu Bulelèlà, Dikunji dya Kapyà dimwedimwe dyàkalombolà Izaleela mu cipèlèlà mwàmwa adi. Didi dilombola leelu ewu, Mukenji wa mushindu wumwewumwe awu, wà ne: “Pàtukàayi mu Éjiipitù!” . . . ? . . . Dituku edi Mufundù ewu wùlù. Nwènù’s nudi bamanyè Mukenji wàkambaYe.

¹⁶¹ Tàngilàayi cikèènà-kumòna cya ku Tucson, kùkaadi bidimu bisatu, pàmvwà mwimane kaaba aka mu kajila. Piine apu, bidimu bitaanu kumpala kwa cyòci aci, Yèyè wàkamba ne: “Dituku dyàshìmikà cimenga dikunji kumpala kwa ciibi aci, ùkudimukè ùye ku Wesètè.” Beena mu tabernacle wanyi bàdi kaaba aka abu, mbamanye ciprofet- . . . cikondo aci—aci. Ncya bushuwa.

¹⁶² Nenku dituku dyàkafikà Mukalenge Goynes ne bakwabo abu mwaba awu, ne kushimikabò dikunji adi, mèmè kwambila mukàjàànyì ne: “Kùdi cintu kampànda pa bwalu ebu.”

Yèyè ne: “Ncinyi ciine aci?”

Ki mèmè kubwela e kutàpa dísù mu kaamukanda kàànyì kakese. Ki cyòci aci’s.

¹⁶³ Nenku dinda dya pàakacyàbu adi, pa dībà dikumi jaajaaja, mèmè musòmbe muntwamu, mu cibambalu cyànyì amu, lwà pa dībà dikumi, Mwanjelo wa Mukalenge kupwekaYè. KwambaYè ne: “Ndà ku Tucson. Neùsanganyiiibwè lwà ku nord-est wa Tucson, nenku nekùlwe Banjelo mwandamutekète mu kasumbù bàànyùkushà buloba bujimà pabwipi neebè.” Ki kwambaYè ne: “Bwalu mbwà bàkwambidila kwòkò aku.”

¹⁶⁴ Mbanganyi bàdi bavùlùke bwalu abu, kaaba aka, kumpala menemene kwa kwenzekaci? [Disangisha didi dyàmba ne: “Amen.”—Muf.] Kùdi bantu basòmbe kaaba aka mu citanda emu mene dilòòlò edi, bàvwà biimàne mwaba awu mene pààkenzekàci.

165 Nenku kwamba Yè ne: “Bitampi Mwandamutekète bya maalu masokoka mwandamutekète a Bible mujima ne bikangudiibwè, ne nebyūjè Bwàkabuulwibwà 10, bwa ne mu Mukenji wà Mwanjelo wa mwandamutekète bintu ebi nebyènzekè.” Dituku edi Mufùndù ewu wùlù twètù badimwène. Dituku edi Mufùndù ewu wùlù.

166 Cidimu cishààlè eci, twètù biimàne pa kaaba kamwekamwe aku, mèmè ne Mukalenge Wood ewu, tuvwa twenda tubànda kakùnà, byenzè bu madilu kampànda, a mukàjèndè mwikàle ùsaama, Nyuma Mwimpè kwamba Yè ne: “Angulà dibwe didi kaaba kàka dyàdya. Údyèlè mūlulu mu lupeepèlè. Pàkaadidi dipweka, amba ne: ‘EMU MMÙDÌ MUKALENGE WÀMBA, nekwikalè dilumbulwisha dyàdikùmà pa buloba.’ Òmwambile ne yèyè neàmòne cianza cya Nzambi, mu mēbà makeke àdì àlondà aa.”

167 Mēmè kwambila Mukalenge Wood; yèyè ùdi kaaba aka dilòòlò edi. Ne, ngeela meeji, mwandamukùlù anyi dikumi bàà ku bantu abu, anyi dikumi ne bataanu, bàvwà mwaba awu dībà divwàci cyenzèke adi; dinda dya pàakacyàbu, mwaba wùvwà Mukalenge mupwekè mu mvùnda ne mupandè mukùnà wùvwà mu nyūngulukilu wetù awu, ne mukòse nsongo ya micì, ne mutuutè makùbàkùbà asatu, ne mwambe ne: “Dilumbulwisha nditàngile ku Côte Ouest.”

168 Matuku abidi paanyima pàà cyòci aci, Alaska kwambayè kutùkina mwinshi mwa buloba. Ne kubangila dībà adi, myaba yònsò pa Côte apu, mibyolu ya dilumbulwisha dya Nzambi yikatuuta ku ridò wa nyuma awu. Kùdi ridò wa cyamu, kùdi ridò wa nshishibà, ne kùdi ridò wa mpekaatu.

169 Dishidimuka ndyenze lwendu pamwe ne dībà dya muulu; nansha Evanjeeliyo kabidi. Mbalwè bùumukila ku esètè ne bayè ku wesètè, mùdi dībà dya muulu diya amu. Nenku mpindyewu Ùdi ùsanganyibwa pa Côte Ouest. Kèna mwa kuya kupita apu to; Yèyè muyè mupite apu, Ùdi wàlukila cyàkàbìdì ku esètè.

170 Mupròfetà mmwambe ne: “Nekùlwe dituku didi kadiyi mwa kubìkidiibwa ne mmundaamuunyà anyi mbufuku to,” dituku dya dibwicidile, mvula yàbùngì ne mafwima, anu bùngì bukùmbàne mwa kumanya mwa kuya kashàala wa mu ekeleeziya anyi kufùndisha dìnà dyebe mu mukanda wa mènà. “Kadi nekwikalè Bukènkè lwà ku ìbaamulòòlò.” Dituku edi Mufùndù ewu wùlù.

171 D-î-b-à dimwedimwe—dimwedimwe dya muulu ditù dijuukà ku esètè adi ndyòdì d-î-b-à dimwedimwe adi ditù dikabwelà ku wesètè. Ne M-w-â-n-à umwèumwè wa Nzambi wàkalwa ku esètè ne kuDishindika bu Nzambi mumwènèshìibwe mu mubidi awu, m’M-w-â-n-à umwèumwè wa Nzambi mu cipaapu cya ku wesètè eku, udi munkaci mwa kuDimanyisha munkaci mwa ekeleeziya dilòòlò edi awu, umwèumwè awu makeelela, leelu, too

ne kashidi. Bukênkè bwa dilòòlò bwa Mwânà bwàfikì. Dituku edi Mufùndù ewu wùlù kumpala kwetu.

172 Tudi tusanganyibwa mwaba kaayi mu cikondo cya bwena Abraham eci? Tudi tusanganyibwa mwaba kaayi mu dîbà dinene mutùdì biimàne emu, dîbà dinene ditùdì ne mwoyi edi? Bikèènà-kumòna byònsò mbyûle.

173 Twămbè munyî pàvwà mulunda wetù mukese mwambi kaaba aka, mukwàcishi wa mu ekeleeziya mwaneetu, Junior Jackson awu, muvùkùte lubilu mulwe kutùdì dilòòlò adi, mêmè mwikàle kuntwaku, kwambayè ne: “Ndi mulòòte ci-cilòòtà, Mwaneetu Branham, cintàcisha be. Ndi mumòne bânà beetu bònsò bakùngwile pa kakùnà.” Ki yèyè kwamba ne: “Pa kòkò kakùnà apu, wèwè uvwa utùlongesha màleetà àvwà mafùndapù, bîmwèka bu ne, mu amwe màleetà cikondo cìvwa cyondòle mu dibwe amu. Pawàjikijì aci, byònsò abi pààjikibi, wèwè kutwàmbila, wamba ne: ‘Seemènaayi pabwîpì apa,’ ki twètù bònsò kukùngwilapù.”

174 KwambaYe ne: “Wèwè kwela cyanza mu mwaba kampana ne, kumwèkabi bu ne, wèwè kwangata bu mulonda wà mbàlaminè ne kutuuta ne kukàngula lusongo lwa cipaapu cikese cya musaka aci. Nenku, pààkakàngukàlu,” yèyè ne, “dibwe dya granite kadiyi ne cintu ciifùndapù to. Ki wèwè kutwàmbila bwa ‘kutàngila pa cyòci eci.’” Ki nwènù bònsò. . . “Twètù bònsò kubanga kutàngila.” Yèyè ne: “Mêmè kukùdimuna mutu, ne mêmè kukumòna uya mutàngile ku wesètè, uya anu ne mwebe mwònsò, mutàngile kùdì dîbà dikabwela.” Mbanganyî bàdì bacivùlùke? [Disangisha didi dyàmba ne: “Amen.”—Muf.]

175 Ki mêmè kushààla mwimane mwaba awu too ne pààkacibuululà Nyuma Mwîmpè. Mêmè kwamba ne: “Bible mujimà, anu mwàkaMubuulwilàbo muntu, ku dibingishiibwa, dijidiibwa, dibàtiiza dya Nyuma Mwîmpè, dibàtiiza mu Dînà dya Yesu, ne bintu byònsò ebi, mmubuulùdîibwe; kadi kùdì malu masokome àdì masokoka munda amu, bwalu Bible mmukànga ne Bitampi Mwandamutekète. Ndi ne cya kuya kuntwaku bwa mêmè kubîpeta.”

176 Mu dinda adi pààkapwekà Banjelo mwandamutekète abu ne kutaayishabò buloba apu, ne mabwe kubùukawù àya nseke yònsò, Banjelo mwandamutekète bààkiimana mwaba awu ne bàakamba ne: “Alùkilà ku Jeffersonville, kùdì mufùmîne aku, bwalu Bitampi Mwandamutekète bya maalu masokoka mwandamutekète nebikangudiibwè.”

177 S’ki twètù aba, leelu ewu, biikàle tuumvwa *Dimiinu Dya Nyòka*. Mu matuku makese emu, bu Nzambi mwa kwanyisha, netùmvwè bujaalàme bwa *Dibàkà Nè Difwà Dya Dibàkà*. Ne bintu bikwabo byònsò bìdì Nzambi mukàngùle ebi, Citampi cyònsò, maalu masokoka a kacya ku difùkà dya dyulu ne buloba.

Ne tudi mu disanka, bwa Bwikadi bwa mabènesha Èndè! Aci ncilelèlè. Dituku edi, Mufùndù ewu!

¹⁷⁸ Cikàndàkàndà cya *Life* nciipàtùle kaabwalu kàà cyôci aci ne: “Cijèngù cya Bukènkè bwa kabùyi bùumvwika cidi cibànda kumutu kwa Tucson ne kwa Phoenix,” mushindu wumwewumwe wùngààkanwàmbilà pabwìpì ne cidimu cijimà kumpala kwa kwenzekaci, mùvwàci mwa kwikala, ne cyenzè bu cipaapu cya matumba asatu. Fòtò awu mmukùdika mu ekeleeziya kuntu kwàka. Nwènù bàdi bangàte cikàndàkàndà aci nudi nendè. Ki cyôci cìvwà mwaba awu aci, anu menemene. Mbambe ne: “Cidi mu butùmbùke bwa kilòmèètà makumi anaayi ne yisatu ne bucyàmà bwa kilòmèètà makumi anaayi ne mwandamukùlù.” Kì mbanjì kuumvwa cidi cyenzèke to. Ncimwènèke mu mushindu wùdì kawùyi wùmvwika ne ciyè mu mushindu wùdì kawùyi wùmvwika.

¹⁷⁹ Mwaneetu Fred Sothmann, Mwaneetu Gene Norman ne mèmè, biimàne mwaba awu’s, isatu mbujaadiki, byenzè bu pa lusongo lwa mukùnà: Peetèlò, Yakòbò, ne Yone, bwa kufila bujaadiki, kwimanabò mwaba awu ne kubandilabò pààkenzekàci, ne kucimònabò cyènzeka.

¹⁸⁰ S’ki Cyôci aci, cilembèlèle mu dyulu; mu ntàntà mule, mùdì kamùyi citaleela, kamùyi mutaleela anyì nì ncinyì bwa kwenza di—dibungi. Bàvwa bafwànyine kafika mwine mwàmwa munyi? Bàvwa m’Banjelo bàà Nzambi munkaci mwa kwalukila, paanyima pàà Mukenji wàbò. Dituku edi ciprofeta aci ncyùle munkaci mwetu. Dituku edi Mufùndù ewu mmùle.

¹⁸¹ Tàngilààyi, Bitampi Mwandamutekète mbikàngùdìibwe. Mvùnda ùdì ku Côte Ouest. Mpindyewu, kacinùpicikù to, mwàkabàpitàci kwòkò aku.

¹⁸² Mpindyewu, yetu ntèmà, tùtambààyi kuyitùmakù ndambu ku dyetu dituku. Mufùndù wùdì wàmba cinyi pa bìdì bitàngilà leelu, ne cikondo citùdì ne mwoyi? Yesu wàkula . . . Ncyàkwikala ne dîbà dya kubyàngata byònsò to, kadi ndi muswe kwangata eci nunku kumpala kwa twètù kujikija.

¹⁸³ Yesu wàkamba, mu Luukà Munsantu nshapita wa 17, ku mvensa wa 30. Yesu Kilisto, Dìyi Dyòdi diine! Nudi nwi tabuuja aci anyi? [Disangisha didi dyàmba ne: “Amen.”—Muf.] Yesu Kilisto, Dìyi Dyòdi diine, divwijìbwe mubidi, wàkaakula wàmba cìvwà Dìyi mwa kwikala mu cikondo cya nshìikidilu eci, cìikalà cimanyinu cya nshìikidilu wa buloba. Wàkabàmbila ne ditùnga divwa mwa kujuukila ditùnga naadi, kadi kwambaYè ne: “Anu mwàkadibi mu matuku a Sodomà, ki mwìkalàbi kabidi mu dituku diikalà Mwànà wa muntu munkaci mwa kubuuludiibwa.”

¹⁸⁴ Mpindyewu, pààkalwà Yesu pa buloba, Wàkalwa mu dîna dya Bàna basatu: Mwànà wa muntu, udi mupròfetà; Mwànà wa Nzambi; ne Mwànà wa Davidi.

185 Mpindyewu, Yèyè ùvwa ne mwoyi pa buloba apa. Kàakambakù ne Ùvwa Mwànà wa Nzambi to. Wàkamba ne: “Ndi Mwànà wa muntu.” Yehowah Yèyè mwine wàkabiikila Yèhezèkèlè ne bapròfetà ne: “Mwànà wa muntu.” Bwalu, bìvwa bikèngela bwa kulwaYè kuuja Mufùndù bu mupròfetà. Mòsà wàkamba ne: “Mukalenge Nzambi wenù neàjuule Mupròfetà mufwànàngàne ne mèmè.” Ki bwa cinyi Yèyè kàvwa mwa kwikala Mwànà wa Nzambi kuntwaku to, bwalu Ùvwa Mwànà wa muntu. Yèyè... “Diyi divwa dilwa kùdi bapròfetà.” Ne Yèyè ùvwa Diyì mu kaabujimà Kààdi. Mwànà wa muntu, mu—mupròfetà munene... Kàyi mupròfetà munene to, kadi Mupròfetà-Nzambi, “Kaabujimà kàà Buzambi mu mushindu wà mubidi kàvwa munda Mwèndè.” Ki bwa cinyi, Yèyè ùvwa Mwànà wa muntu.

186 Patùdi twakulangana apa, munda mwa bidimu binunu bibidi, Yèyè mmumanyike kutùdi bu Mwànà wa Nzambi, Nyuma.

187 Kadi mu Bukalenge bwa bidimu cinunu, Yèyè neikalè Mwànà wa Davìdi, pa Nkwasa wa butùmbi. Tudi bònso bamanyè nanku, twètù bàdi biitabuujà Mifùndù.

188 Mpindyewu, Yesu mmwambe, kundekeelu menemene kwa cikondo cya ekeleeziya citùdi twètù ne mwoyi eci, ne “Mwànà wa muntu ùvwa mwa kubuuludiibwa cyàkàbìdi mu mushindu wumwewumwe wàkadibi awu, mwàkadibi ku Sodomà amu.”

189 Tàngilàayi, bilondèshile maalul-malonda, mùdiYe mucifile. Wàkamba ne: “Anu mwàkadibi mu matuku,” dyàmbedi, “a Noà, muvwàbo bàdya, bànwa, bàsèlelangana, bàsèlesha bànà.” Pashìishe kutwàlaYè, cìvwà cìlondà, cya ndekeelu, ùya naaci ku Mwànà wa muntu, ku Sodomà. Bwalu, kwàka Yèyè ùvwa ùkwàta mudimu ne beena Yudà; apa, ku Sodomà, Ùdi ùkwàta mudimu ne bàà Bisàmbà bya bendè. Kwàka, Wàkabàshebeya bònso ku màyi, mu dilumbulwisha adi; apa, kùdi bàà Bisàmbà bya bendè, Wàkabòòsha bònso mu dituku dya Sodomà. Neya bushuwa. Bantu bàà Bisàmbà bya bendè bàakooshiibwa kwòkù aku, “nenku ki mwikalàbi kabidi pààdibuululà Mwànà wa muntu.” Kacicyèna kabidi màyi to, kadi neciikalè kapyà bwa ewu musangu. Yesu wàkabadila mu Genese 23 umwèumwè mutùdi tubala emu, pàakabalàYe bwa Sodomà apu.

190 Mpindyewu, tudi twitaba ngiikàdilù yìdi myamba ya, ya ngiikàdilù wa Sodomà, beena Sodomà, ngiikàdilù wa Sodomà awu. Twètù, muntu ne muntu, netùtwe “amen” ku cyòci aci. Tudi twitabuujà cyòci aci. Eyo.

191 Ne ngiikàdilù wa nyuma wa Laòdikiyà, ekeleeziya wa mu mubidi awu, netùtwe “amen” ku cyòci aci, ne netwitabè bimanyinu byabo. Tudi bamanyè ne cimanyinu ne cimanyinu cidikù. Ekeleeziya ùdi ùsanganyiibwa mu Laòdikiyà. Aci tudi bamanyè. [Disangisha didi dyamba ne: “Amen.”—Muf.]

192 Tudi bamanyè ne buloba bùdi mu ngiikàdilù wa Sodomà. Mmwòmò anyi? [Disangisha didi dyàmba ne: “Amen.”—Muf.] Netwitabè cyòci aci.

193 Kadi bìshi bwa cimanyinu cya Abraham, uvwa mwindile mwânà mulaya awu? Aci’s cívwa ncikwabo pààci.

194 Vùlukàayi ne, bàvwa ne Sodomà kuntwaku; bàvwa ne musanjeela wabò. Ne Abraham ùvwa ne Musanjeela mulwe kudiye.

195 Abraham ùvwa mwindile, ku dituku ne ku dituku, yêyè, mwindile cintu cívwa ciibwîpì ne kwikala kaciyikù mwa kwenzeka to. “Sarah, ne bidimu makumi citeema, ne mulùme ne bidimu lukama.” Bilondèshìle mulayi wa Nzambi, yêyè ùcívwa anu mwindile. Munkaci mwa bijaanu byònsò abi, yêyè ùvwa anu mwindile mwânà awu.

196 Ki mùdì pèndè mwena kwitabuuya mulelèlè mucíkàle mwindile bwa Mwânà mulaya awu àlukilè! Mònaayi, pabwîpì menemene ne mwânà awu kufikayè, kùvwa cimanyinu cyàkamupèèshàbo. Kabyènakù bikèngela bwa cimanyinu cya Mwânà ulwàlwa awu kubuuludiibwaci kùdì Dimiinu dya bukalenge dya Abraham didi dindile Mwânà wa Bukalenge awu, bya mwomumwe ne mwàkadìbi bwa taatù Abraham uvwa mwindile mwâna wa mu mubidi awu anyi? [Disangisha didi dyàmba ne: “Amen.”—Muf.] Ncya bushuwa anyi? [“Amen.”] Yesu ngudi mwambe nanku, mu Luukà Munsantu 17.30 emu ne: “Kumpala kwa cikondo eci kulwaci,” ne, “Mwânà wa muntu ùvwa mwa kubuuludiibwa mwàkabuuludìbwàYe mu matuku a Sodomà, kumpala kwa dibutudiibwa dya Sodomà.” Mpindyewu twètù tudi munkaci mwa kukèba cimanyinu kampanda.

197 Mpindyewu twàngatàayi ngiikàdilù ya cikondo mùvwàyi mu Sodomà amu. Mònaayi ne, bònsò bàakaya e kubwela mu cyena Sodomà, bàà pa buloba.

198 Ngeela meeji ne umwe wa ku balombodi bàà maalu a sèndèmâ mmwenzè mukàbà wà bindidìmbì, anu abidi àdì panshi aa, ne ngàkapeta mpùngà wa kuwùmòna, ùvwa ne, *Sodomà*. Bu nwènù mwa kuwùmònakù ní kakwèna cingà cintu to anu cyòci aci, kùtapaayi dísù. Ncya bushuwa ne ncimfwànyì cìmpè cya États-Unis leelu ewu, Hollywood, anu menemene; mrvwàdilu wa mushindu anu wumwewumwe ne bikwabo byònsò bìvwàbo bènza musangu awu mene; maafètes manene a bakwàciki bàà maalà ne bikwabo byònsò, ditèndeleelela dya bantu, batèndeleeleedi bàà ku dîna.

199 Mònaayi, ne Sodomà awu ùvwa ne ntèmu, ne ùvwa mmuntu dîna dyèndè Lotà, uvwa mwikàle anu mwânà wa mwanaabo ne—ne Abraham.

200 Mpindyewu, Abraham kàakayakù yêyè mu Sodomà to, yêyè ne kasumbù kèndè. Ùvwa ne cisumbù cìnène ku luseke lwèndè, bakumbàne mwa kulwà mvita ne kucìmuna bamfumu batwe ku

dikumi ne babidi ne cilwilu cyabo. Pa nanku, ùvwa ne cisumbù cinène ku luseke lwèndè. Nenku ùvwa musòmbe pambelu apu mwinshi mwa mucu wà nsànga, dǐngà dituku, pàvwà maalu ônsò mamwendè kabèsà; kakùyi muntu nansha umwe ùmucyùka to, kadi yèyè ùvwa anu kacya wàkwàta ku mulayi awu.

Tàngilàayaaku mpindyewu, ne ntèmà yònsò, kumpala kwa twètù kujikija.

²⁰¹ Pàvwàye musòmbe mwaba awu apu, kulwakù bantu balùme basatu, balwè tàmàkàtàmàkà too ne pàvwàye apu. Babidi bàà kùdìbò kupwekabò mu Sodomà ne kubàyiishabò Evanjeeliyo, bwa kupàtukabò, bayiishè Lotà. Mmwômò anyi? [Disangisha didi dyamba ne: “Amen.”—Muf.] Kadi Umwe wàkashààla ne Abraham. Mònaayi, Yèyè wàkashààla ne Abraham awu ùvwa Nzambi Yèyè mwine. Bakwabo babidi abu bàvwa Banjelo biikale baamisànjeelà.

²⁰² Mpindyewu, mu Sodomà, kabààkenzakù bishima to, anu kubàtwa bufofo. Ne kuyiisha kwa Evanjeeliyo kùtu misangu yònsò kubàtwa anu bufofo.

²⁰³ Mpindyewu tàngilàayi mmwènekelu wa dituku adi. Kùdi ekeleeziya wa mubidi. Misangu yònsò anu mu isatu, mungãmbì makeelela dilòlò, ki mùdi Nzambi muleejìbwe. Kùvwa beena Sodomà, beena Lotà, ne beena Abraham. Cìdi mu mushindu wumwewumwe awu dilòlò edi, ki mùdi bàà pa buloba bàsanganyiibwa anu mushindu awu.

²⁰⁴ Lekèlaayi nnùkonkèku cintu kampànda. Tàngilàayi mmwènekelu ewu mpindyewu. Abraham wàkabiikila Muntu uvwa wakula nendè ewu ne, “Elohim.” Mwakù wà mu cyena Ebèlù *Elohim* wùdi wumwija ne “Ewu udi mukumbàne mu byònsò, Ewu udi Wa Cyendelele,” Elohim, Nzambi Yèyè mwine!

²⁰⁵ Ku cibangidilu, Genese 1, mmwambe ne: “Ku cibangidilu Nzambi. . .” Angàtaayi mwakù wà mu cyena Ebèlù awu, anyi, mwakù wà mu cyena Ngelikà awu’s wè: “Ku cibangidilu *Elohim* wàkafùka mau lu ne buloba.”

²⁰⁶ Mwaba ewu, Yèyè, mu Genese, lwà mu 22 emu, Yèyè ùdi wàmba kabidi, anyi—anyì lwà mu 20, Yèyè mmwambe, ne yèyè wàkabiikila dǐnà dya Muntu ewu ne “Elohim.” Wàkenza nanku bwa cinyi? Nzambi, muleejìbwe mu mubidi wa buntu, wàkasòmbe ne Abraham ne kudya dyàmpà dyela munyìnyì wà kànà kàà ngombe, ùnwa mabèèle, ne ùdya dyàmpà. Nzambi Yèyè mwine, ne wàkajìmina kumpala kwa Abraham awu.

²⁰⁷ Kadi Yèyè wàkamupèèsha cimanyinu kampànda. Mònaayi. Ne cyòci cimanyinu aci cìvwa cya ne Yèyè ùvwa mwelè nyima ku ntentà.

²⁰⁸ Kadi vùlukàayi ne, Abraham awu, dǐnà dyèndè divwa *Abram* ndambu wa matuku kumpala kwa cyòci aci, ne Sarah ùvwa *Sarra* kumpala kwa cyòci aci; S-a-r-r-a pashiishe S-a-r-a-h, ne

A-b-r-a-m kulwayè A-b-r-a-h-a-m. *Abraham* mbwena kwamba ne “taatù wa matunga.”

209 Mpindyewu tàngilàayi ne ntèmà yàbúngi kaaba aka, nenku netùmonè mmwènekèlu wa díba ditùdi ne mwoyi mpindyewu edi, mùdi Yesu mutwámBILE bwa kukèba mmwènekèlu ewu. Twamònu bikwabo byàci byònsò anu bímpè; mpindyewu tùmònáayi Dimiinu dya bukálenge, mmwènekèlu udibò ne cya kumòna.

210 Mpindyewu Muntu ewu wákamba ne: “Abraham, mukajèèbè Sarah, udi penyì?”

Ki Abraham kwambayè ne: “Ùdi mu ntentà, paanyima Peebe apu.”

211 Mpindyewu, Yèyè kacya kàvwakù mwanjì kumòna mukaji awu to. Mmunyì mwákamanyàYe ne dínà dyèndè ùwwa ng’*Abraham*? Mmunyì mwákamanyàYe ne dínà dya mukaji ùwwa n’*S-a-r-a-h*? “Abraham, mukajèèbè Sarah, udi penyì?”

Kwambayè ne: “Ùdi mu ntentà, paanyima Peebe apu.”

212 KwambaYè ne: “Mèmè. . .” “Mèmè,” mupinganyi muleeji muntu. “Mèmè nènkwènèkèlè bilondèshile mulayi awu. Mukajèèbè neàlèlè mwànà awu. Wèwè wângeeyèmènyì, mpindyewu Nèncifikishè ku dyenzeka.”

213 Ki Sarah, mu ntentà amu, paanyima apu, ùteelejila mu ciibi, anyi mutèye dici, mwònsò munùyàkucibiikilà amu, ùtèelejila mu ntentà, kusekelayè mu dyàpà, kwambayè ne: “Mpindyewu, mémè ewu, mukajì mununu múnkaadi emu, mpeta masanka ne mukalenge wanyì; ne yèyè pèndè, mununu, pambelu pààpa ne bidimu lukama? Bya bwalu, ebi nyewu kabiyikù byenzèke kùkaadi bidimu byàbúngi, byàbúngi menemene.”

214 Nenku Muntu awu, M-u-n-t-u, musòmbe mwaba awu munkaci mwa kudya, mu mubidi wà buntu, ùnwa ne ùdya bu muntu wetù wa pàtupù ewu; ne lupwishi ku bilamba, ne lupwishi ku makàsà, ne Abraham kuòweshayè máyi. Nzambi, Yèyè mwine, kukènzakanaYè, ne kwambaYè ne: “Sarah wàsekì bwa cinyi, munda mwa ntentà emu, wamba *cikampànda*?” Yèyè wákamanya, ùwwa mwa kujingulula meeji a Sarah mu ntentà, paanyima Pèndè apu. Ncya bushuwa anyi? [Disangisha didi dyamba ne: “Amen.”—Muf.]

215 Mpindyewu, pààkalwà Dimiinu dya Bukálenge dya Abraham pa buloba, ncimanyinu kaayi cyàkaleejàYe? Mwànà wa muntu awu. Simonà wàkalwa kùdiYe dīngà dituku; Andèlè ngwákaya nendè. KwambaYè ne: “Dínà dyebe n’Simonà. Udi mwànà wa Yona,” mwàkambàYe. Nwamònu’s, aci kumuvwijaci mwena kwitabuujà.

216 Filipò kuyayè kangata Natànàèlà, kwalukilayè. Kwambayè ne: “Lwà, kúmonè Muntu Utùdi—Ùtùdi bapètè: Yesu wa ku Nazàlèètà, mwànà wa Yòzefù.”

217 Yèyè ne: “Mpindyewu anjì indila kakese. Cintu cîmpè ncifwànyìnekù kupàtuka mu dikolesha dya maalu dyàdya anyi?”

Yèyè ne: “Lwàku, ùmone.”

218 Pa nanku Filipò mmwenze anu ùfika mu Bwikadi bwa Yesu anyi, pamwe ne Natànaèlà, Yesu kumutàngila e kwamba ne: “Mónaayi mwena Izaleela udi munda kamüyi budimù.”

Awu kwambayè ne: “Laabì, Udi mummanyè dîbà kaayi?”

219 Yèyè ne: “Kumpala kwa Filipò kukubìikilayè, paùvwà mwinshi mwa mucì apu, Mémè mvwa mukumòne.”

220 Yèyè ne: “Laabì, Wèwè udi Mwànà wa Nzambi. Udi Mfumu wa Izaleela!”

221 Mukàjì mukese wà ku ciinà cya mâyi awu, mu ngiikàdilu wendè wa masandi awu, pàakafikàye, kaacintu kampànda kàà cifwànyìkijilu kàà mushindu ewu, bwa kusunayè mâyi. Yesu ùvwa mutùme bayiidi Bendè, bwa kuyabò kasùmba byàkudya. Pàakalwà mukàjì awu bwa kusunayè mâyi, Yèyè kwamba ne: “Mukaji, Ntwàdìlèku mâyi a kunwà.”

222 Mukaji awu kwambayè ne: “Kacitu cilele bwa Wèwè kwamba nanku nansha. Muneemu tutu ne disungulujangana. Mpindyewu, nwènù beena Yuda kanùtu neetù malanda twètù beena Sàmaalèyà to; twètù katwèna neenù malanda to.”

223 Yèyè ne: “Kadi, mukàjì, bu wèwè mumanye Mwine ùdi wakula nendè ewu, wèwè’s nguvwa mwa kuNdòmba Mémè mâyi a kunwà. Mémè mvwa mwa kukupèesha mâyi àudi kùyi ulwa kusuna apa to.”

224 KupetaYè mwaba wùvwà disaamà dyèndè disanganyiibwa, cìvwàdì. KwambaYè ne: “Ndà ùkangàtè bàyeebè kadi ulwe mwaba ewu.”

Yèyè ne: “Ncìtu ne bàyaanyi bwalà.”

225 Yèyè ne: “Wambi bulelèlè. Ukààvwa naabò bataanu, kadi ùdi musòmbe nende awu kì ngwebè to.”

226 Yèyè ne: “Mukalenge, ndi njingulula ne Wèwè ewu udi mupròfetà. Tudi bamanyè ne pààlwà Maasiyà Yèyè kì watùleeja bintu ebi.”

Yesu kwambaYè ne: “Mémè kì Yèyè awu.”

227 Pa cyòcì aci, kubwelayè lubilu mu cimenga ne kwambayè ne: “Lwâyì, kanùmonàayi Muntu Wàngambidi bintu bìndì mwenzè. Kì n’Yèyè ewu Maasiyà anyi?”

228 Tàngilàayi, Yèyè wàkenza aci kumpala kwa beena Yudà, ne beena Sàmaalèyà, kadi kacya kàakacyenzakù kumpala kwa bàà Bisàmbà bya bendè to. Bàà Bisàmbà bya bendè, twètù aba, tuvwa bampàngaanù mu miine matuku awu, matùnga makwabo, twenda bambùle kabwengà paanyima, tukuukwila mpingù. Katùvwakù bindile Maasiyà to.

229 Yèyè ùdi ùmwènekela anu aba bàdi baMwindile, ne twètù mbàdi ne cya kwikala baMwindile.

230 Kadi aba bàvwà bàlaka mukana bàmba mùvwàbo baMwindile, ekeleeziya yèyè mwine's, pàakamònàbo aci cyènjiibwa, bàakamba ne: "Yèyè ndémon. Mmwenà lubùkù, Beelezèbùlà!"

231 Ki Yesu kwambaYè ne: "Bwa awu mpekaatu nebàbàfwilè luse," bwalu Yèyè kàvwa mwanjì kufwa to. "Kadi," mwàkambàYe, "dìngà dituku Nyuma Mwìmpè neàlwe ne neènzè cintu cimwecimwe eci, ne kuMwamba dìyi dibi dimwepele kakwàkufwidiibwakù luse to." Adi ndituku edi, didi Dìyi dyònsò ne cya kuswikakana. "KuMwamba dìyi dibi; kakwàkufwidiibwakù luse to nansha mu eci cikondo nansha mu cikondo cìlwalwà."

232 Adi òvwa n'Dimiinu dya Bukalenge dya Abraham. Kadi apa Diminu dya Bukalenge dya Abraham adi, didi dilwè bwa dimanyishiibwa dya Muntu uvwa musòmbe kuntu kwàka ne Abraham awu adi, ndilwe bwa kujaadika ne ùvwa n'Nzambi umwèumwè awu, mwikàle ùlaya mu dituku edi ne: "Anu mwàkadibi mu matuku a Sodomà, ki mwikalàbi kabidi ku dilwa dya Mwànà wa muntu, pàdiYe munkaci mwa kuDìbuulula bu Mwànà wa muntu apa." Amen. Edi ki dituku didi Mufùndù ewu ne cya kuula.

233 Tàngilàayi mmwènekelu mutùdi tusanganyiiibwa leelu ewu. Tàngilàayi ekeleeziya mùdi Mwànà wa Nzambi... Tàngilàayi dituku dibwicidile edi. Tàngilàayi bipròfetà byònsò. Mpindyewu, cintu cya pabwàci cidi ne, beenyi beetu nebiikalè ne cya kwikalapù dībà adi, byòbi bikengela bwa mmwènekelu kwikalayè mufwànàngàne ne wa ku Sodomà.

234 Kwàkalwà bantu basatu, bantu bàà bàkèmesha basatu batùma bàfùmina ku Dyulu. Netwitabè aci. Basatu; Umwepele wàkashààla ne Abraham. Bònsò bàakabangila kuntwaku, kadi Umwepele wàkashààla ne Abraham. Bakwabo abu bàkapweka mu Sodomà. Mmwòmò anyi? [Disangisha didi dyàmba ne: "Amen."—Muf.] Ne Abraham ùkaavwa ne dìnà dishintulula, dyumùke ku Abram dilwè Abraham. Ncya bushuwa anyi? ["Amen."]

235 Musangu nansha wumwe mu maalu-malonda, ekeleeziya wa pa buloba, kacya kàtuku mwanjì kupeta mutangadiki muyè kùdiye, mwikàle ne dìnà dijikila ne h-a-m to, anu mu dituku edi, Billy G-r-a-h-a-m. Mmwòmò anyi? [Disangisha didi dyàmba ne: "Amen."—Muf.] G-r-a-h-a-m, màleetà asambombo. A-b-r-a-h-a-m ùdi ne màleetà mwandamutekete. Kadi G-r-a-h-a-m udi ne màleetà asambombo, cidi ciikàle maalu a pa buloba, muntu. Nwamònu anyi?

236 Tàngilàayi cidi cipàtùke kuntu kwàka, leelu ewu, s'mbaamisànjeelà bàà ku Dyulu abu.

237 Kùdikù muntu pa buloba apa udi muyiishè kanyinganyinga bitòòke tòò bu mùdi Billy Graham anyi? Kùkaadikù muntu ukaadiku ne bwenzeji pa bantu, bu mùdi Billy Graham anyi? Kacyapù kî nkwanjì kwikala wa nanku to, pa buloba bujimà, muntu kampànda. Kaa, Billy Sunday, ne bakwabo, bàvwa muneemu mu Ètats-Unis emu, kadi Billy Graham yêye mmumanya buloba bujimà. Nudi numòna kùdiye yêye ùbiikidila anyi? Mu Sodomà.

238 Ne yêye ùdi ne kasumbù kèndè kamushindikiji kuntwaku pamwe ne ekeleeziya wa beena Mpenta, Oral Roberts.

239 Kadi bishi bwa kasumbù kàà Basungula? Ncimanyinu cya mushindu kaayi cìdibo ne cya kumòna? Bàdi ne cya kupeta cinyi? Aleluuyah! “Nekwikalè Bukênkè ku ibaamulòòlò.” Dituku edi Mufùndù ewu wŭlù. [Disangisha didi dicyònkómoka—Muf.] Dituku edi mulayi wà Nzambi wŭlù. Tudi bamanyè ne aci m’Bulelèlè. Yêye ùdi kaaba aka dilòòlò edi mùvwàYe musangu awu amu.

240 Mpindyewu, bwa kuciyyiisha, cingãmbi katanci aka aci, wêwè uyiisha ní ncinyi cyònsò ne ciikàle Bulelèlè bwa Evanjeeliyo, Nzambi díbà adi mmwenzèjìibwe bwa kucishindika. Ncya bushuwa anyi? [Disangisha didi dyamba ne: “Amen.”—Muf.] Mpindyewu, byòbì nanku, Nzambi wákafùnda Díyi awu, Nzambi wákenza cipròfètà aci awu, Nzambi udi Nzambi wa Díyi awu, àpatukè àjaadikè ne Yêye ùcidi anu Nzambi.

241 Mwàkabàndà Eliyà ku mukùna; ùtàngila, Elishà wákaya bwa kubandila Eliyà, kwambayè ne: “Ndi muswe bitùpà bibidi.” Ki cikòwelu cìvwà pambidi pàà Eliyà aci kumataci pambidi pàà Elishà. Kwasayè lwendu, kubùnyayè mbùlankète awu mpìtu yibidi ne kutuutayè pa musùlù, kwambayè ne: “Nzambi wa Eliyà ùdi penyì?” Ki cintu cimwecimwe cìvwà cyenzèkèle Eliyà aci, kwenzekelaci Elishà.

242 Nenu Evanjeeliyo umwèumwè awu, Bukole bumwebumwe abu, Mwànà wa muntu umwèumwè ùvwakù makeelela awu, udikù leelu, ne neikalèku kashidi. Ebèlù 13.8. Nudi nuCìitabuuja anyi? [Disangisha didi dyamba ne: “Amen.”—Muf.] Nanku, ndi nnùlòmbakù. Mémè ncyèna mwa kwikala Yêye to, kadi Yêye ùdi kaaba aka. [“Amen.”] Twètù tudi anu cyambudi cyanàànà.

243 Bamwe bàà kunùdì aku, bàdi bàsaamà ne mu ntatu, bàdi bamanyè ne mémè ncyèna munùmanyè abu, Nzambi mpindyewu. . . bu mémè mwa kudìpwekeshakù bikùmbàne. Sambilaayi nùlombè Nzambi.

244 Ncyèna ngeela meeji ne. . . Kakwèna karta kàà disambila nansha kamwe mu citanda emu to, mmwômò anyi? To, ncyèna. . . Katùvwakù baabànye twarta twa disambila nansha. Netwikalè mwa kwenza disangisha dya milòmbò ku. . . anyi dyondopa dya babèèdi, ku ekeleeziya. Kadi, nwènù sambilaayi.

245 Kadi nudi bamanyè ne mèmè ndi mwenyi anu wa menemene ewu kunùdì. Nwamònu's, nudi bammanyè mèmè, nwènu Jeffersonville! Ncyèna muswe bwa beena mu Jeffersonville bènzè nanku to. Ndi muswe bantu bàà kule ne muneemu emu bàà ku mwaba kampànda. Mònaayi Nzambi ní ùcìtu anu ùbuulula! Mònaayi Yèyè ní ùcìtu anu umwèumwè awu makeelela, leelu, too ne kashidi!

246 Enzàayi mwàkenzà mukaji mukese awu amu. Yèyè wàkpicila munkaci amu, wàmba ne: “Mèmè ndi ngiitabuuja Muntu ewu.” Ùvwa ne mashi àlwa munda, ne kwambayè ne: “Mèmè anu mwa kulenga luzemba lwà civwàlù Cyèndè, ndi ngiitabuuja ne nénsangalè.” Ncyà bushuwa anyi?

247 Bwa diitabuuja dyèndè, dituku adi, Mufùndù wàkuula. “Yèyè ùdi wòndopa mpùtà wa mwoyi mucìbùlùke, mwondòpe babèèdi ne balèmà.”

248 Mukaji awu mmwenzè anu ùlenga civwàlù Cyèndè aci, ùpàtuka ùsòmba, Yèyè kukùdimuka e kwamba ne: “WàNdengì awu nganyi?” Mmunyi mùvwàYekù mufwànyine kumanya, mu musùmbà wà bantu bunènewù awu, pàmwápa misangu makumi asatu kupita wùdì apa dilòlò edì ewu, binunu bya bantu? Wàkacimanya munyi? KwambaYè ne: “WàNdengì awu nganyi?” Yèyè kàakamba aci anu bwa kwamba to; Wàkamba aci bwalu ncilelèlà. Ki Yèyè ne: “WàNdengì awu nganyi?” Ki dyàkàmwè kukènzakanaYè ne kumònaYè mukaji mukese awu, mwaba wùvwàye musòmbe anyi mwimane, mushindu wònsò wùvwàye awu, kumwambilaYè ne mashi èndè àvwà àlwa munda awu àkajika.

249 Awu ùvwa n'Yesu makeelela. Awu n'Yèyè leelu. Nudi nwitabuuja nanku anyi? [Disangisha didi dyàmba ne: “Amen.”—Muf.]

250 Ncyèna mukumanyè to; Nzambi ngudi mukumanyè. Kadi udi ne mikenyi ya dĩaamà mu lubadi mwebe amu, yìkutàcisha bikole. Ncyà bushuwa. Udi musòmbe mwaba awu usambila bwa cyòcì aci. Ndi mwenyi kùdì, ne twètù katùyì bamanyàngàne anyi? Juukà kuulu, ní mmwòmò. Ncyèna mukumanyè to. Ng'ewu muntu mulùme udi mu ditumba ewu, nsongààlùmè wa citende ewu. Udi kabidi ne pa muminu pàkusaama. Ncyà bushuwa. Ki cyùdì usambidila. Udi mubindùlùke anu menemene bwa cintu kampànda. Nebikengelè bwa wèwè kushiya disangisha edì, bwalu udi mwambi, udi ne bipungidi bìdì bikèngela bwa wèwè kutàngila. Aci ncyà bushuwa. Uh-huh. Udi witabuuja ne Nzambi mmumanyè ne wèwè udi nganyi anyi? Révérend Mukalenge Smith, mpindyewu udi mwa kuya ne kwondopiibwa. Yesu Kilisto wàkwondòpù. Ndààku ku disangisha dyebe; muminu wèbè awu kawàkukutàcisha to.

Wàlengiyè awu nganyi?

251 Kùdi muntu mulùme musòmbe paanyima *apa* mene; ùdi ùsaama. Ùdi ne cyùjà cya kansere ku cisulùsùlù cyèndè cya dyàbakàjì. Yèyè kí . . . Kí ngwa muneemu to. Uvwa mwena mudimu wa mu biinà bya tubanda. Ncya bushuwa. Mémè ndi anu mwenyi wa menemene kùdi. Ní ncya bushuwa, nyungishà cyanza cyebe aci. Cyùjà aci cidi mu cisulùsùlù cyebe cya dyàbakàjì aci, ne udi mudìlongòlòle bwa kukupandabò dyàkámwè. Mmwómò anyi? Kwèna wa muneemu to. Udi wa pambelu pàà cimenga. Udi wa mu Virginie. Ncya bushuwa. Udi witabuuya ne Nzambi mmumanyè ne wèwè udi nganyi anyi? Mukalenge Mitchell, ncya bushuwa, alùkilaaku mwebe ùmwè bimpè. Yesu Kilisto ùdi ùkusàngaja. Nùkonkàayi muntu awu! Ncitu mwanji kumumònakù to, kacya bàndela. Yèyè ùvwa musòmbe mwaba awu, ùsambila.

Dituku edi Mufundù ewu!

252 [Mwaneetu Branham ùdi wèla disangisha nyimà—Muf.] Ki inàbànzà nyèyè ewu musòmbe paanyimà *apa* mene, paanyimà pàanyi *apa*, anu mùvwà Sarah mu ntentà amu. Ùdi ùsambila bwa mwanèndè wa bakàjì. Juukilà kuulu. Mwanèèbè wa bakàjì awu kèna muneemu to; ùdi kule, mwanèèbè wa bakàjì awu. Ne mbya mwomumwe bwebe wèwè anu muvwàbi pàakalwà mukàjì kampànda kùdi Yesu apu, uvwa ne mukàjì kampànda ùtácishiibwa bikole kùdi démon. Mukàjì awu ùdi . . . mwànà wa bakàjì awu mmukwàta kùdi démon. Kèna muneemu to. Ngwa mu . . . Udi wa mu Caroline du Nord. Udi witabuuya nanku anyi? Ne aci mbulelèlè, kí mmwómò anyi? Màmamù Orders, udi mwa kwalukila kwebe. Wèwè mwitabùùje ne mwoyi wèbè wónsò, nèukasangànè mwanèbè wa bakàjì anu mwàkasanganyiibwà yèyè awu pàvwà Yesu Kilisto mu matuku a kale, mwambe ne wàkondopiibwa amu.

253 Dituku edi Mufundù ewu; cimanyinu cya Sodomà, cimanyinu cya Dimiinu ditàmbìdìle, cimanyinu cya ekeleeziya wa mubidi! Dituku edi Mufundù ewu wulù munkaci mwenu. Nudi nuciitabuuya anyi? [Disangisha didi dyàmba ne: “Amen.”—Muf.]

254 Nudikù baswe kuMwitabuuya mpindyewu mene bu Musungidi ne Mwondopi wenù anyi? Juukilaayi kuulu, nwènù bônso, nwamba ne: “Ndi ngiitaba dyondopiibwa dyànyì. Ndi mMwitaba bu Musungidi wanyì. Ndi mMwitaba bu Mfumu wanyì.” Muntu yónso àjuukilè kuulu.

Dituku edi! Tèèlejàayi, nwènù balunda bàanyì.


255 “Yèyè wàkabala Mufundù, kwalujila mwakwidi awu Bible, ne,” mùdibi byambiibwe, “mèsù ónsò a bantu àvwa maMubànkàmènde kùdiYe. Ki kubàtàngilaYe, kwamba ne: ‘Dituku edi Mufundù ewu wulù.’”

256 Mémè ngàabadì Mifundù, ne bileeeji dikumi ne bibidi anyi bipite apu bya ne tudi ne mwoyi mu dituku dya ndekeeluu,

lukòngò lwàmònà Yesu Kilisto wàlukila pa buloba. Ne mèmè ndi nnwàmbila cyàkàbìdì, dilòòlò edì ne, dituku edì Mufùndù ewu wùlù nwênù badìmwène.

²⁵⁷ Nwênù bàdì mu Tucson, nwênù bàdì mu Californie, nwênù bàdì mu New York, ku nshinga eyi ya ku telefone, dituku edì Mufùndù ewu wùlù mu mèsù enu.

²⁵⁸ Twìkalàayi ne disànka ne tucyonkomokàayi, bwalu Dibàkà dya Mwànà wa mukooko dikaadi pabwìpì, ne Mukaj'Èndè-musèla . . . Mukaj'Èndè-musèla wăDìlongòlòlù.

²⁵⁹ Twélàayi byanza muulu tùuMupè butùmbi, nwênù bantu bônso. Nzambi ànùbènèshè. [Disangisha dìdì ditùngunuka ne kucyònkomoka ne kutùmbisha Nzambi—Muf.] 

DITÛKÛ EDI MUFÛNDU EWU WÛLÛ LUA65-0219

(This Day This Scripture Is Fulfilled)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diitânù dilòòlò, mu matuku 19 a ngondo mwibìdì, cidimu cya 1965, ku Parkview Junior High School mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org